

Mak

Suguek san Jon Jesus san dal ikubune ya

Mat 3:1-12; Luk 3:1-18; Jon 1:19-20

¹ Dal en bilaluŋ uyanan Jesus Kristus Anut Nanun niŋen o fun igane ya.

² Nek profet Aisaia wagam iŋanen buk lo igo igire,

“Ale. Naisag bilaluŋ tamol ŋidinip, oŋ nao na imug yau a.

Tamol an oŋane dal ikubune pano wa.”

³ “Tamol ta san awan, tan kawan tamolpein an tia yak ate tubun mi iwagiŋ dugo igo ibol:

‘An gidad Tubun en san dal akubune wa, iŋanen dal tureŋ yabi san akubune dop itaot mok ilasa wa.’”

⁴ Agog Jon ipalug, tan kawan tamolpein an tia yak ate tamolpein isuguai dugo ilod dibilisap suguek diŋane dop an lo iŋaned aupasek fidian Anut ipasi wan san ru man ifulale pidinai se ya. ⁵ Aria, tamolpein a fidian Judea provins lo dumado dan, agod Jerusalem tamolpein wei mi dam Jon san ru duloŋ o diaug iŋsan na dilasa ya. Ante man iŋaned aupasek fidian mi walal te dubol ilasag, Jon dida you Jordan lo dudug isuguai idu ya. ⁶ Aria, Jon iŋsan yamel man kamel fufulun lo duwei ak igane ya. Let man makau sunulon nam digane an luan te iyati a. Iŋanen anaŋ man sis, agod garaŋ san niniu mi yani se ya. Inj tamol kawan ak ago woŋ itor se ya. ⁷ Iŋanen bilaluŋ ru tamolpein naod na ibol ilasa man igo ya. “Murnap tamol ta ŋai patug fo

ipalu wa, tamol an san dabai n̄aisag irin̄ani geig a. N̄ai man in̄anen sendal n̄upasi san turug n̄usoluwip n̄itakoksi dop san kam n̄usupasi wo ta idaisuda na ya. ⁸ N̄ai an̄ you lo mi n̄usuguan̄ a. Ak gug tamol en man Awan Urgun lo isuguan̄ a.”

Jon Jesus isugui agod Satan ibitinae ya
Mat 3:13-17; Luk 3:21-22

⁹ Saen an lo Jesus panu yan̄an Nasaret Galili distrik lo yan ibiseig, you Jordan ate Jon san na yau a. Atna Jon Jesus isugui a. ¹⁰ Nek saen a Jesus you ibiseig kuai te isuda man, kumaen panu san dalawan pasek go yen dugo, Anut san Ur muluk on̄ idug, in̄ kabun̄an fufo imasi dugo ile ya. ¹¹ Agog kumaen panu lo wagin̄ ta idug igo ibol dugo ilon̄, “On̄ man n̄aineg Nanug, n̄aineg bubeg mok, on̄ nin̄e wo ilog tubun mi uyanan da.”

Satan Jesus naon ikubiani a
Mat 4:1-11; Luk 4:1-13

¹² Agog gamu nam Urgun iduduwig tan kawan ak lo yau a. ¹³ In̄ aben ante nal kitek milaen mi, ad 40 tidom 40 sen imado dugo Satan ipalug, bitinaek lo igane ya. Aben ante mel kasik ak dam dumado na ya. Aria, Satan san bitinaek fidian itout go en̄el adi dupalug Jesus kagin dupani a.

Jesus in̄san megeloum malmalan ak igiai a
Mat 4:12-22; Luk 4:14-15; 5:1-11; Jon 1:35-42

¹⁴ Aria, kin̄ Herod Jon yabig isubani dugug, Jesus yang Galili distrik lo ilasag, ante Anut san bilalun̄ uyan ak walal te ibol ilasag tamolpein dulon̄ se ya. ¹⁵ In̄ igo ibol, “Nal ilasa la ya, Anut san kagin panek

an san saen sumeik a. Man ninjen o an ilom ibilisa dop bilalun uyan nrupaian dan ilom lo rumok a.”

¹⁶ Jesus You Galili san aen gigin fo itor dugo tamol ta tein da yil a. Tamol an imug yanjan Saimon, in tein Andru da. Uraru an iy njalanjal, ago yan lo inaned dob you lo dubal idu dugo, Jesus ipalu ya. ¹⁷ Agog irupidai, “Nai njieg abag ari gup tamol anjal san njipitenjanan a.” ¹⁸ Agog dob dubal yen dugo njen aban diri kisaek on a.

¹⁹ Agog Jesus you aen gigin irig kitek isuda yau man, Jems Sebedi nanun an tein bakan ak Jon da yil a. Tamol uraru an wog fo iy dob duwei se ya. ²⁰ Agog Jesus uraru mi igiai kisaek on go tamadi Sebedi wog fo tamol ibiai an dida dumado dugo dibisawaig Jesus njen aban dirig diau a.

Jesus tamol tinin lo ur saiak ikudig yau a

Luk 4:31-37

²¹ Agog diaug, panu tubun yanjan Kaperniam atna dilasa ya. Ubou nal, Sabat dubol dan lo, Jesus ubou ab ta lo iladug tamolpein ipitenjanai o fun igane. ²² Ago dugo ru an dulon go durut saian. Man dugo, in nek ibol insiganed kubaien san girek manau adi dupitenjanai na yak on ago ta ipitenjanai na ya. Tia, in tamol yanjan tubun anda yak on ago ipitenjanai se ya. ²³ Aria, Jesus ru ibol dugo, ubou ab an lo tamol ta ur saiak ta aman da yak dam ate imado ya. ²⁴ In awan tubun mi iwagin go ibol, “Jesus, on Nasaret tamol, on manjsama na ata mel gane wo palu yak i? Nag on man daon panama wo palu i? Nai on njalon uyanan a, on Anut san gun tamol.” ²⁵ Ak man Jesus ru dabai nam igo irupe, “On awa itau. Tamol en biseip lasa wau!” ²⁶ Agog

an lo ur saiak an tamol an yabig, ikinjan isuruwor go in itarfuni a. Agog ur saiak an awan tubun mi isasai dugo ibiseig ilasa yau a.

²⁷ Man ninen o tamolpein an fidian durut saian mok a, an lo insed nug lo dinjen se ya, agog igo dubol, “En so mel ta yak i? Nag pitenanek foun ak boi? Insan ru dabal tubun aman da ya. In ka ur sisaiak ru kagin ipidinau dop in awan dulong pe dilasa diau a.” ²⁸ An lo njen Jesus ninen o yan ririan ifufurak go panu fidian Galili distrik ilon lo yak ate yau a.

Jesus tamolpein subam amad da yak ikubune idu ya

Mat 8:14-17; Luk 4:38-41

²⁹ In ubou ab an dibiseig Jems Jon da dinjal go dida Saimon in Andru da sad ab lo diau a. ³⁰ Pita raon subam ifunig tinin wananan go, gadab fo insiganen ab lo diganeg yen a. Man ninen o pein an njen o Jesus durupeig ilon a. ³¹ Agog Jesus yaug, pein an banin yabig itur o ibinawi a. Gamu nam subam an ibiseig pein an imasa kisaek on go anan ikubune pidinau a.

³² Gurai isig ad idiau dugo, tamolpein fidian subam amad da, agod a ur saian saian amad da yan dam, dinjal go dupalu ya. ³³ Panu tubun an san tamolpein wei kasik ab san dalawan sinjiren na dutumanig dumado se ya. ³⁴ Ago man Jesus tamolpein wei mi subam funfun amad da yan ikubuniau dugo ur saiak wei mi dam tinid lo ikudai diau a. Ak man in ur saiak adi njen o dinjen san njen o ipadau a, man ata wo, ur adi amaiak Jesus enti mok an dulong fufei a.

Jesus aben tamolpein tia yak ate Anut lo igudani a

Luk 4:42-44

³⁵ Tidom lom mok, saen ad gamugo ilasa dugo, Jesus imasag ab an ibiseig aben ta yoitout ak lo yau a. Ante man Anut niŋen o igudani se ya. ³⁶ Ak gug Saimon in turan dida dumado yan, Jesus abanja dile wo niŋen aban dirig diau a. ³⁷ Saen in dile man durupeig dubol, “Fidian mi on dilio wo abanja diabi da.”

³⁸ Ak man Jesus awad yabig ibol, “Id panu aenta sinjired na dien dan lo tau a. An lo ate dam nai ru ka nfulale pidinai a. Man ata wo, urat nek en niŋane wo niŋasa ya.” ³⁹ An lo man in Galili distrik ilon lo turen yabi se ya, sad ubou ab fidian lo ru ibol ilasa dugo ur sisaiak tamolpein tinidi lo yan dam ikudaig dilasa diau a.

Tamol ta tinin lepra yafutani a

Mat 8:1-4; Luk 5:12-16

⁴⁰ Nal ta man tamol ta tinin lepra yafutani an ipalug isumiani wo turun isoluwig irupei, “On ilo ibol tap, nai kubuniag pe tinig uyan ilasa da wa.”

⁴¹ Agog Jesus ilon tubun mi imuŋani tag banin iwateg yabig ibol, “Ubol agom nai ilog ago yen da, uya lasa.” ⁴² Agog lepra ibiseig yau dugo tamol an tinin uyan ilasa kisaek on a.

⁴³ Agog Jesus tamol an ru dabai nam ru kagin irupei. In ririan idinig yau o niŋen o igo ibol.

⁴⁴ “Kagin gane, kulob ilasa yen niŋen o aenta ta rupidai na wa. Tia, itaot waup, tini Juda sad pris mi kubiaip ile dop, mudan a Moses san kubiaen lo ibol an nanep Anut yai gane pani. An lo dop tamolpein dulon ak onane subam itout a.” ⁴⁵ Gug

tamol an yaug, mel en Jesus igane an niŋen o ibol itilani se ya, an lo ru an panu panu lo yau a. Man niŋen o Jesus iŋ fon panu tutubu yak lo walal te iladu san tia ya. Amaiak niŋen o iŋ aben tamolpein tia yak ante mi imado dugo tamolpein banen fidian lo yan iŋsan na dupalu se ya.

2

*Jesus tamol subam anda yak tinin iganeg uyan a
Mat 9:1-8; Luk 5:17-26*

¹ Nal wei tiag Jesus fon imul panu Kaperniam na ipalu ya. Agog tamolpein Jesus ante imado dan niŋen ru duloŋ a. ² An lo tamolpein wei mi iŋsinan ab lo dupalug dutumani a. Ab an ilon lo nug dusupini dugo patun fo dam ab dalawan siŋiren na aben tia ya. Ago dugo Jesus Anut san ru ifulaleg duloŋ se ya. ³ Ago dugo tamol iwoiwo iŋ tamol ta ŋien banin fidian itubabun ak kapal anda Jesus giranen na disinig dupalu wo digane ya. ⁴ Ak man tamolpein mi dal dufutani an lo iŋ diau san dal tia geig a. Ago tag ab patun fo tet fo disidag diaug, ab aten lak na katik* nam gubak mi digane an fo digansi a. Ago yen dugug mutunuk ta fuŋ fufo diganeg diabigigeg gug mutunuk an lo tamol kapal anda yan duyuweg, Jesus imado dugo naon na digane idu ya. ⁵ Agog saen Jesus iŋaned ilo rumok ile man tamol an irupeig ibol, “Ŋaineg nanug, ŋai oŋane aupasek fidian ŋusuas yau la ya.”

⁶ Aria, ate man kubiaen san girek maŋau aenta dumado ya. Iŋsan ru ibol en duloŋ go an lo ilod igo weiwei se ya. ⁷ “En ata wo ru naon ago ibol ak i?”

* **2:4:** Foi

Inj Anut lo ru kukok igane da! Ak dugo, tamol ta inj ka aupasek isasi yau ak i? Tia geig, kulob an Anut san mi a.”

⁸ Gamu nam Jesus ilon lo, tamol an kankan dugoma digane se yan ilon uyanan a. Ago tag inj igo irupidai, “An ata wo ilo wei igo agane dak i? ⁹ Dugomaiak pasauman ak i? Njai nabol, ‘Onjane aupasek nupasi yau o?’ Tia, nabol, ‘Onjane masap kapal njanep utor a?’ ¹⁰ Ak gug kulob e njanep an lo nai, Tamol Nanun, tan en lo Anut wagen lo aupasek ka nupasi yau amaiak alon o ...” ago ibol go tamol a njien banin tubabun aman irupe, ¹¹ “Onjane masa utur pe onjane kapal njanep sinjane ab lo wau.” ¹² Agog tamolpein malad lo man, tamol an imasa kisaek onj go san kapal yabisag isinig kuai te ilasa ya. An lo man inj fidian durut saian mok dugo Anut yanjan diabisa dugo dubol, “Manj kulob ta naok igo yak gubak mi mileu man tia geig a!”

Jesus inj Livai iwagi a

Mat 9:9-13; Luk 5:27-32

¹³ Murnag Jesus fon yang you tilianek san lon na itor dugo tamolpein malan tubun mok dutumanig Jesus dubuluwig manau ipidinai se ya. ¹⁴ Jesus you aen gigin irig isuda yang ab ta, ate tamolpein sad na moni takis dijnane dak ate ilasa man, takis njlanjal tamol ta imasig imado dugo ile ya. Tamol an yanjan Livai, Alfeus nanun. Agog irupe, “Njeg aban uri.” Agog Livai imasa go njien aban iri a.

¹⁵ Murnag saen Jesus Livai san ab lo imasig imado dugo sisem ananj diani man, takis njlanjal wei mok agod “aupasek tamol” wei mi dam, dupalug dumasig Jesus injanen megeloum dida ananj

diani a. Man dugo, tamolpein a njen aban diri se yan wei mok a. ¹⁶ Kubiaen san girek manjau adi lulunad lo ensauta a inj dam Farisi adi amaiak mel en Jesus megeloum dida digane dan dile dugo inſan megeloum adi igo dusumianai, “En ata wo tamol en takis nilaſal tamol adi agod aupasek tamolpein dida sisem anan diani dak i?”

¹⁷ Ak man Jesus inſad sumianek ilon go irupidaig ibol, “Tamolpein a tinidi uyan an dokta san na ta diau na da, tia, tamolpein subam anda yak mi ago digane da. Nai tamolpein itaot adi ago dubol dak njigiaip dupalu san njen o ta npupalu na ya, tia, aupasek tamol anami njigai o npupalu ya.”

*Anan lo geg digane an njen o Jesus dusumiani a
Mat 9:14-17; Luk 5:33-39*

¹⁸ Aria, nal ta lo suguek san Jon inſan megeloum adi agod Farisi adi dam inj anan lo geg diganeg dumado se ya. Tamolpein ta Jesus san na dupalug dusumiaen, “Jon san megeloum agod Farisi adi dida nal kadi anan lo sed geg ipidinai da, ago gug ata wo onſijane megeloum anan lo geg ta digane na dak i?”

¹⁹ Agog Jesus awad yabig igo ibol, “Tamol ta iwon da sad nug naneſ san saen an ilom isou a. Ak dugo, saen tamol an inanen turan muroun dida dumado dop, anan lo geg digane wak i? Tia ya. Saen inj dida dumado dan waliſ digane san tia geig a. ²⁰ Gug nal ta ipalu dan te gup, Anut inj nug naneſ san tamol an ipasi yau pidinai a, nal an lo man waliſ digane wa.”

²¹ “Tamol ta yamel kilaken ta ikukuik na yan ta irasirep ate yamel wagam ak san mutunuk ta iwei

na da. Man dugo, ago igane tap, yamel kilaken foun an yamel wagam an irae dop fon irasire dop daonj ipani wa. ²² Agod tamol dam wain foun ak bilelek sunjon wagam ak lo ta diwali na da. Man dugo, ago digane tap, wain foun an iganep bilelek sunjon wagam an ikafut yaup ipuk dop, wain ikulmaek pe tan fo idu dop, bilelek sunjon dam daonj ipani wa. Fun an ninen o inj wain foun ak bilelek sunjon foun ak lo mi diwali da.”

Ubou nal san Tamol Tubun a
Mat 12:1-8; Luk 6:1-5

²³ Ubou nal ta lo Jesus kon san abi ilon lo itor se ya. Ago dugo inſan megeloum inj kon aenta dufunig fun diganeg diani se ya. ²⁴ Gug Farisi adi dil tag Jesus durupej, “Ule, en ata wo kagin a Sabat nal lo tigane san ninen o idsad kubiaen j ipadau amaiak gamu onane megeloum adi digane dak i?”

²⁵ Ago man Jesus inſad awa biek ru naon irupidaig ibol, “Nag mel e Dawid igane yen ta asuti na i? Dawid inj turan muroun dida kadag san saen lo dimatigen dugo ananj o katuk amadi a. ²⁶ Mel en wagam mi saen Abiatar inj pris gurman imado dugo ilasa ya. Aria, Dawid Anut san ab lo iladug, bret a Anut naon na didirig dien an inaneſan yani a. Ak man bret an inj lo geg a, nek Anut san pris inj mi ka diani wa. Ago bo man inj dam inaneſan yu tamol adi bret aenta iwae pidinaig diani a.”

²⁷ Agog Jesus fon irupidaig igo ibol, “Tamol inj ubou nal san mel, ago Anut ta igane na ya, tia geig. Ubou nal man tamol san mel, nek ago mi igane ya. ²⁸ Fun amaiak ninen o, Tamol Nanun man ubou nal an dam inſan muroun a.”

3

Sabat nal lo Jesus tamol ta banin saian ak ikubune ya

Mat 12:9-14; Luk 6:6-11

¹ Nal sen ta lo Jesus ubou ab lo iladu ya. Tamol ta tuon ikurnak yau ak ante imado ya. ² Tamol aenta ate dumado dan in Jesus tinin fo ru digane wo dal aban dile se ya. An ninen o in maladi ti ibol dugo Jesus ata mel igane wo dak dile san tawan an digane se ya. In tamol e banin ikurnak yau en Sabat nal lo ikubune tap, an ninen o boum dupani wa. ³ Aria, Jesus tamol e banin saian en irupe, “On masap, titinaem utur.”

⁴ Agog Jesus tamol en isumianai, “Kubiaen dugo ibol ak i? Ubou nal lo, id ka kagin uyan ak tigane wo? Tia, kagin saian ak tigane wak i? Patu pasek tupani wo? Tia, tufuni imat ak i?” Ago man in fidian tok dubol go dumado ya.

⁵ Jesus yil ilubanai dugo ninedi wo tinjen wananan idu dugo ilon tubun geig ipapao se ya, man dugo, in bubedi man dabai geig a. Agog Jesus tamol en irupeig ago ibol, “Onane bani itaot wate.” Agog in banin iwateg, uyan ilasa kisaek on a. ⁶ Agog Farisi adi kuai te dilasag silei nam in kin Herod san warou adi dida sisem fun diganeg palan an dumari a. In dugo won Jesus daon dupani wak o nug lo dukubiai ila iso se ya.

Tamolpein doup tubun Jesus san na diau a

Mat 12:15-16; Luk 6:17-19

⁷⁻⁸ Agog Jesus inanen megeloum dida dugursig you saltek san lon na dudu diau a. Ago dugo Galili tamolpein malan tubun Jesus njen aban fo diau

a. Tamolpein tan titin wei mi kulob naok naok Jesus igane na yan ninen o dulonj an lo inſigned panu panu dibiseig inſan na dupalu ya. Tan Judea adi wei mi dam dutumanig Jesus dirig diau a. Tamolpein malan tubun, Jerusalem na yak, Idumea provins lo yak, you Jordan aen ate yak, Taia inj Saidon da sad lonj na yan dam dususag dutumani a. ⁹ Agog Jesus inſan megeloum adi irupidaig, inj gidad wog ta dijanep, sumeikan dususep yen dop fo isuda wo ibol. Man dugo, tumanek tubun mok inj dubuluwi se ya, kabelan inj tinin dupini saian banau. ¹⁰ Man dugo, inj imug mi tamolpein wei mi ikubuniaia a. An lo tamolpein a subam ad da yak fidian dususag dubuluwig Jesus tinin kitek diabi dile wo inj lo dututou se ya. ¹¹ Agod saen ur saiak saiak talpein tinid lo yan Jesus dile man, talpein an Jesus naon na turud dusoluwig awad tubun mi diwaginj go dubol, “Onj Anut Nanun mok.” ¹² Ak gug Jesus inj ru kagin dabai geig ipidinaig ago ibol, “Anj njai enti mok an ninen o tamolpein ta arupidai na wa.”

Jesus megeloum 12 ipilianai a

Mat 10:1-4; Luk 6:12-16

¹³ Jesus tan bubun ta ate isidag, tamol adi dugomaiak inſan dilasa wo ilon yen an igiaig dususag inſan na dilasa ya. ¹⁴⁻¹⁵ Agog inj tamol 12 ipilianaig, inj dida megeloum adi igo wonj dumado dutor na ya. Murnap idiraip diau dop ru dufulale wa, agod inj dam ur sisaiak tamolpein tinidi lo yan dukudaip diau san dabai amad da ya. ¹⁶⁻¹⁹ Aria, megeloum 12 e itarpasai en yanadi igo ya. Ta Saimon, inj Jesus yanjan foun ak Pita ipate. Ta

Jems, in tein Jon da, nuḡod urarum Sebedi nanun muroun, uraru en Jesus yaḡadi foun ak Boargenes ipate ya, (yaḡak an fun man weil fufu tamol.) Ta Andru, ta Filip, ta Bartolomiu, ta Matyu, ta Tomas, ta Jems in Alfeus nanun, ta Tadeus, ta Saimon in ru wagai san tamol, agod Judas in man panu Keriot san tamol, emaiak murnag in Jesus ninen o palan imarig ager tamol banid lo igane ya.

*Jesus Beelsebub ida urat digane dak ago dubol a
Mat 12:22-32; Luk 11:14-23; 12:10*

²⁰ Aria, Jesus turan ta san ab lo iladu dugo tamolpein wei geig dupalug fon dutumani a. In inanen megeloum adi dida dusupinai se yan lo anan diani san tia geig a. ²¹ Saen Jesus muroun muroun in mel emaiak ninen o duloḡ man, dumasa saian go sad panu dibiseig Jesus diabi wo dupalu ya. Man ata wo? In dubol, “In burau ifuni da.”

²² Agod kubiaen san girek maḡau ensauta a Jerusalem na dupalu yan in dam igo ibol, “Tamol en tinin ilon lo man ur saiak Beelsebub anda ya. In ur sisaiak sad gurman inanen dabai nam ur saiak aenta tamolpein ilod lo yan ikudaig diau da.”

²³ Ago tag Jesus igiaig inḡsan na dupalug ru mitilaen funfun nam irupidai duloḡ se ya. “En dugo woḡ pe Satan in ka sen ikudip yau ak i? An ago igane san tia geig a! ²⁴ Kin san kagin panek aben lo, inḡsan tamolpein sed itarpalaip malan uraru dilasap nug dufuni tap, kin an san kagin panek aben an dabai itur san tia geig a. ²⁵ Agod warou kisaek san tamolpein in tarpalek uraru dilasap nug dufuni tap man, warou an dam dabai itur

san tia wa. ²⁶ Agod Satan in sen yu iganep an lo in muroun muroun sed itarpalai tap, aria, in dabai itur san tia dop inanen dabai itout a. ²⁷ Ak man tamol ta in tamol dababai geig ak ta san melmel isini wo inanen ab lo iladu san tia ya. Tia geig a. In gidad imug mi tamol dababai an rasau nam isubani gup, in ka tamol an san ab lo iladup melmel isinip yau a.

²⁸ Nai rumok nurupaian da, aupasek fidian agod nao futek ru fidian dam tamolpein digane dan Anut ka isuas yau a. ²⁹ Ak gug talpein ta in Awan Urgun naon ifute tap, aupasek an Anut ta isuas yau na wa. Tia, inanen aupasek emaiak pempem mi yen yau a.” ³⁰ Jesus ago irupidai a, man ata wo, tamol amaiak imug mi in ninen o, “Tamol en ur saiak aman da yak,” ago dubol a.

Jesus tinan agod tein muroun

Mat 12:46-50; Luk 8:19-21

³¹ Saen nek an lo Jesus sinan tinan in tein muroun dida dupalug kuai te dumado ya. Ago dugo tamol ta didinig ab ilon lo yaup Jesus kuai te ilasa wo irupeia. ³² Ago dugo tamolpein wei kasik Jesus siniren na dumasig dubuluwig dumado se ya. Ago dugo aenta in durupeig dubol, “Ulon ak, onane tina tei murou dam kuai te dutur da, on insad na wau o digio da.”

³³ Ak man Jesus awad yabig ibol, “Ensauta mok naisag tinag muroug, teig muroug ak i?” ³⁴ Ago dugo malan yang tamolpein giranen na dumado dan yil go ibol, “Naisag tinag di teig muroug nek en mi a! ³⁵ Tamolpein ensauta a nai Tamag kumaen

panu lo yan ilon duri dupani dan, nek anami
 ɲaisag teig, lug di tinag muroug a.”

4

Anaɲ kubulan bilabal tamol san ru faɲan

Mat 13:1-9; Luk 8:4-8

¹ Murnag Jesus Galili san you tilianek ate yaug
 loɲ na imado dugo afon fun iganeg tamolpein
 ipiteɲanai se ya. Agog tamolpein wei mi iɲsan
 na dususag dutumani itilani a. Saen an lo doup
 tubun mok. Ago tag Jesus wog lo isudag imasig
 imado dugo tamolpein fidian dutumani man loɲ
 na ditur se ya. ² Ante man Jesus ru faɲan lo mel
 wei mi niɲen o irupidai se ya. Ru ta ago irupidaig
 ibol, ³“Aloɲ. Saen ta lo tamol ta ai patun isinig abi
 lo ipae wo yau. ⁴Yaug siɲanen abi lo man ai patun
 banin igane inawaig tan fufo iratitale se ya. Saen
 ratitale man, ai patun aenta dal fufo dudu ya, agog
 anakanak dupalug diani itout a. ⁵ Ai patun aenta
 tan pat anda yak fufo dudu, tan ate man kuror an
 tia, agog milaen tiag ai patun an balud isa, man
 dugo, tan an kuror an tia ya. ⁶ Ak man saen ad
 isuda man ai baludi an dukurɲak diau a. Ai an
 dam dabidi tan lo ta idiau geig na, an lo dukurɲak
 diau kisaek oɲ a. ⁷ Ai patun aenta ud saian an
 lulunad lo dudu, agog sisem disag diau dugo ud
 saian an ai uyan ak yafutani an lo nuɲon ta igane
 na ya. ⁸ Ak man ai patun aenta tan uyan ak fufo
 dudu man nuɲod digane, kadi patudi 30 dilasa,
 aenta 60, aenta 100.” ⁹ Agog igo ibol, “Tamol oɲ
 kududo ama da tap, ru an uloɲ uyanan a.”

Jesus ru faʻan san fun ifulale ya

Mat 13:10-17; Luk 8:9-10

¹⁰ Saen Jesus sen kisaek imado dugo, iʻnanen megeloum 12 agod tamolpein aenta dida diaug, Jesus ru faʻan ibol ilasa amaiak niʻnen o dusumiani a. ¹¹ Agog igo ibol irupidai, “Anut san kagin panek an san melmel imianuk an fidian ipanaŋ a. An lo aŋ mel en fidian ilom itarpasi san niʻnen o alon uyanan a. Ak man tamolpein patun fo dumado dan, iŋ bo ru faʻan dulonŋ ak gug, ru an san fun mok ta dulonŋ na ya. ¹² An lo man,

‘Iŋ bo malad pempem yau a, ak man ilod ta itarpasi na wa,
agod kududod nam dulonŋ bo man, fun mok ta dulonŋ na wa.

Tia dop, nag iŋ ilod ibilisa dop sed itilianaip Anut iŋsad aupasek isuas yau a.’ ”

Ru faʻan an san fun

Mat 13:18-23; Luk 8:11-15

¹³ Agog Jesus irupidai, “Ak dugo, aŋ ru faʻan en niʻnen o ilom ta itarpasi na yak i? Ago tap, en dugo wonŋ pe aŋ ru faʻan aenta fidian dam alon fufei wak i? ¹⁴ Tamol ai patun iratitale den, iŋ Anut san ru ipae da. ¹⁵ Tamolpein aenkadi man ai patun dal te yak ago ya. Ate Anut san ru dipae da. Saen ru an dulonŋ ibol ak, Satan ipalup silei nam ru an ilod lo ipasi iŋane yau da. ¹⁶ Aenta man ibol ai patun tan sagar ak fo idu igo ya, nek anami ru dulonŋ dop yousai amad da ilod lo rumok kisaek onŋ a. ¹⁷ Ak gug iŋ dabid tia yak niʻnen o saen kitekan ka dutur gup, muruan ilasa boi, tia, dukudai dop madai diŋane boi, an lo dop ririan dibilanip dudu wa.

Nek ago mi inşad ilo rumok itout yau a. ¹⁸ Aenta man ud lulunjad lo idu ya. Enami ru duloŋ pe ilod lo rumok a. ¹⁹ Ak gug tan en san ilo weiwei, agod filian san mala bulbal di mel aenta sad ilo masa dam, disaurip itilanip ru an ipapao da. Ago dop ru an nuŋon ta ilasa na wa. ²⁰ Aria, ai patun tan uyanan fufo idu man, tamolpein ru rumok an duloŋ pe san fun dam duloŋ sinjaokan a. Talpein an inŋ mok nuŋod ifu wa, aenta nuŋod 30, aenkadi 60, aenta 100, nuŋod ago ifu wa.”

Lam san ru faŋan

Luk 8:16-18

²¹ Agog Jesus ru faŋan taidam igo ibol a. “Ak dugo, aŋ lam asulani dop, ab ilon lo daeg paen na boi, tia, sareg paen na boi, aguni itur dak i? Tia geig a. Aben lak na yak ate asuŋani wa. ²² Man dugo Anut ilon igo ya, mel fidian gamu mianuk lo yen den, murnap walal te ilasa wa. Agod mel ta dutuani an, nal idu dop ad lo ilasa wa. ²³ Tamol oŋ kududo ama da tap, ru an uloŋ uyanan a.”

²⁴ Agog Jesus fon irupidaig igo ibol a. “Aŋ gidad ru e aloŋ den niŋen o kankan aŋane wo uyanan a. Man ata wo? Tou sapita aŋ tamolpein aenta apidinai dan, tou nek ago yak nam Anut mel ipanaŋ a, agod mel taidam itumani panaŋ a. ²⁵ Talpein ta melmel aenta da yan, Anut taidam ipani wa. Ak gug talpein ta inŋ melmel tia, mel kititik a aman da yan, an dam Anut inŋ banin lo ipasi yau a.”

Ai patun isa dan san ru faŋan

²⁶ Jesus fon igo ibol, “Anut san kagin panek man igo ya. Tamol ta anaŋ patun tan lo iratitale ya.

²⁷ Tidom ad, gidad tamol an yen boi, tia, imasap

itor boi, ai patun an balun isap tubun ilasa wa, ak man dal dugo won mel en ka ilasa man in ta ilon na wa. ²⁸ Tan sen mi iganep balun isap, roun iganep yau dop boban ilasap, rugun iganep, nunon ifu wa. ²⁹ Ak man tamol en saen anan isulot idu yan ile man, bubarek inanep, yaup, anan inane wa. Ata wo, anan nanek san nal idu ya.”

Ai patun kititik aman kawan ak san ru fajan

Mat 13:31-32,34; Luk 13:18-19

³⁰ Fon igo ibol, “Anut san kagin panek ninen o ata ru man ate tou njabip alon ak i? Ata lo njututanip njabol pe ilom itarpasi fufei wak i?

³¹ Tamol ta ai yanan mastet dubol dan patun inaneg siganen abi lo yang ipae ya. Ai an san patun man kititik aman kawan, tan lo pae wa. ³² Ago bo man, saen paep isa den yaup ai tinan on ilasa dop an lo ai aenta irinanai a, agop raen dam idirip ibalsarer dop kusej ka ate wur dufuni wa.”

³³ Jesus in ru fajan nek ago yak wei mi lo Anut san ru irupidaig dulon se ya. Ru sapita dulon go ilod itarpasi wo uyan an mi iri panim, nek ago ibol idu se ya. ³⁴ In pempem tamolpein malad lo mi ru fajan funfun nam ibol ilasa na ya. Ak man saen in san megeloum adi dida sed kisaek dumado dugo, ru fajan an fidian sad fun mok in kuai te ifulale idu dugo dulon a.

Jesus tim beig da irupidaig tok dubol a

Mat 8:23-27; Luk 8:22-25

³⁵ Nal kisaek an lo gurai isi dugo, Jesus inanen megeloum adi irupidai, “Id wog nam you aen ate tau a.” ³⁶ Man ninen o megeloum adi doup dibisawaig, wog lo disuda ya. Saen Jesus in wog lo

isuda man diñaneg ida diyawaig diau a. Wog aenta dam sisem diau se ya. ³⁷ Agog tim tubun ak ifure ya. Ago dugo you tubun geig imasag ibalsinig wog ilon lo iladu se yan lo wog isarir o igane ya. ³⁸ Ago gug Jesus man in wog taen te kalik iganeg yen padal a. Ago tag megeloum adi diaug dufufunig durupeï, “Girek mañau, id tumayau o tator da. On ata wo idsed o ilo ta isou na dak i!”

³⁹ Agog Jesus imasag, tim tamun da ipidaig igo ibol, “Itout! Tokabol!” Agog tim ifure na yan itout dugo you malin idu geig a.

⁴⁰ Ago gug Jesus inñsan megeloum adi irupidaig ibol, “An ata wo tubun mi arer dak i? Ak dugo, an nen gamugo ilo rumok amam da i?”

⁴¹ Jesus ago ibol dubo man in dumasa saian dugo tubun kasik direr se ya. Ago dugo inñsed nug dusumiani, “Tamol en enti mok i? Gidad tim tamun da dumasa yak dubo man awan duloñ a.”

5

Jesus tamol ta ur sisaiak anda ikubune ya *Mat 8:28-34; Luk 8:26-39*

¹ Aria, in wog nam you aen ate diaug, Gerasin sad abañ lo disasau a. ² Saen Jesus wog an ibisei man, tamol ta mutou ibiseig ipalu ya. Tamol en ur saiak aman da ya. ³ In mutou funfun lo imado na ya. Tamol aenta fon dusubani san, sein nam dam ta idaisuda geig na ya. ⁴ Saen wei mi banin ain didirig rasau sakar kasik ak nam nien banin dusubani a. Gug saen fidian in rasau lubuñ an ain dam ituteg isubari idu ya. Tamol an inñsan dabai san fun man senamo geig a, tamol diabi anen tia ya. ⁵ Nal fidian, tidom ad, mutou ilod lo, tan bubun

fo dam isasai iwagin dugo pat luon anda yak nam tinin ititale na ya.

⁶ Aria, tamol en asau mi Jesus ile man, imaspalug yaug san na ilasag naon na turun isoluwi a.

⁷ Agog awan tubun mi isasai dugo igo ibol, “Jesus, Anut lak na geig ak Nanun, on mel ta nai lo i? On ru lak na geig ak nam Anut malan lo rupeip ubol, madai tubun geig ta panag na wa.” ⁸ In Jesus ago isumiani a, man dugo, Jesus in imug mi ur an irupei la yak igo ya, “On ur saiak, tamol en biseip lasa wau!”

⁹ Aria, agog Jesus ur saiak an isumiani, “On yan a enti ak i?”

Agog in awan yabig igo ibol, “Nai yan a Legen,* man dugo, man wei kasik a.” ¹⁰ Agog in afon mi Jesus ilon inane on se, agop Jesus ikudai dop idiraip aben an ta dibisei na wo isumiani se ya.

¹¹ Aria, kitek asau tan bubun luan te man, bor malan tubun geig ak dunuaen se ya. ¹² An ninen o ur sisaiak adi Jesus san na dumosiaig ago dubol, “On kudamap bor an lulu ad lo mau. Ulefunamap bor ilod lo ka miladu wa.” ¹³ An lo Jesus awok ibol tag, ur sisaiak adi dilasag diaug bor tinidi ilon lo diladu ya. Agog bor an fidian mi, sad sutek 2,000 igo yak, in dumasag damab aen te dumaspalu dudug you duluk go dumat pasik a.

¹⁴ Tamol bor kagin dupidinai den disol go dumaspalu on diaug, mel ilasa yan ninen o tamolpein panu tubun ak lo yan, agod a gidigheid dumado dan, durupidaig dulong a. An lo man tamolpein in mel dugo mok ilasa amaiak dile wo dupalu

* **5:9:** Yan a Legen fun man sawar tubun a.

ya. ¹⁵ Saen Jesus san na dilasa man, tamol imug mi ur sisaiak anda yan dileg durut dugo direr saian geig a. Man ata wo, gamu tamol en idagom dugo kankan uyan uyan aman da, ago dugo yamel sen ipulaug imasig imado dugo dile ya. ¹⁶ Agod tamolpein a inſigned malad nam mel a ilasa dugo dile yan, in tamolpein dupalu yan mel dugo mok ilasa yan durupidaig dulon a. Ago dugo mel dugo ilasa yan tamol lo agod bor lo dam, durupidaig dulon a. ¹⁷ Man ninen o tamolpein an fidian awad dutumanig Jesus inaned aben ibiseip yau o ago dumosiai se ya.

¹⁸ Saen Jesus wog lo isuda dugo tamol e Jesus ikubune yan ida diau o maeg iganeg isumiani se ya. ¹⁹ Gug Jesus awan ta yabi nag igo ibol irupe, “Onſigane murou sad na waup, Tubun en ilo munanek sapita ipano, agod sapita ibinawo dam ubol idu dop dulon a.” ²⁰ Ago tag tamol an yaug, distrik a yan an TenTaun dubol dan ilon lo turen yabi on dugo, mel fidian Jesus in lo igane an tamolpein naod na ibol idu se ya. Ago dugo a fidian inanen ru dulon an durut saian geig a.

*Pein bakan ta imat agod pein ta subam anda ya
Mat 9:18-26; Luk 8:40-56*

²¹ Aria, saen Jesus inanen megeloum adi dida tan an dibiseig, wog nam you aen ate afon diau a. Saen lon na disasau man, tamolpein wei mi dupalug dutumani dugo doup tubun ak Jesus dubuluwi a. Jesus in you siniren na imado se ya. ²² Ago dugo ubou ab ta san titianek tamol adi luluſad lo tamol ta yan an Jairus in Jesus san na yau a. In Jesus ile tag naon na turun isoluwi a. ²³ Ilo munanek

ru lo isumianig igo ibol, “Naineḡ nanug pein imat o da. Oḡ palu, bani iḡ tinin fufo na ganep, afon uyan ilasa dop kumaen imado wa.” ²⁴ An lo Jesus imasag iḡ da diau a.

Diau oḡ dugo tamolpein malan tubun an Jesus ḡien aban diri dugo Jesus dusupini se ya. ²⁵ Aria, aben ante man pein ta tinin ilon lo subam anda, nek nal milaen mi dar tinin lo ilasa se, anañar 12 ago imado se ya. ²⁶ Inanen moni samun fidian dokta tinid fo ikukule yau pasik, gug subam an ta digane itout na ya. Tia, subam an yau tubun dugo madai tubun geig ifuni yau oḡ se ya. ²⁷⁻²⁸ In imug mi ru Jesus niḡen o ilon dugo ilon igo isou, “Nai banig nek Jesus san kulos milaen ak ḡusupuri ḡile gup, tinig fon uyan ilasa wa.” Ago tag iḡ tamolpein a Jesus diri an luad isag Jesus patun fo irig yang san kulos bitinēn te yabi ile ya. ²⁹ Ago dugo saen nek an lo mi inanen dar tinin ilon lo yan igos a. Ago dugo iḡ ilon lo sen ikubiani ak Jesus inanen subam igane itout a.

³⁰ Ago dugo Jesus dam ilon lo sen ikubiani kisaek oḡ ak dabai inanen tinin lo yan kuai te ilasa ya. Ago tag doup luluḡad lo idanḡsag isumianaig ibol, “Enti ḡaisag kulos isupuri ak i?”

³¹ Saen inanen meḡeloum adi ru en duloḡ man, awan diabig igo dubol, “Oḡ ule yak, tamolpein wei mi oḡ dusupino futano da, ago bo man oḡ ka ubol ‘Enti ḡai ibiag ak i?’ ”

³² Ak man Jesus naon idanḡsa idanḡla dugo talpein enti mok ile wo malan yau se ya. ³³ Agog pein an, mel e iḡ o ilasa yen ilon oḡ go Jesus san na ipalu ya. In irer dugo isuruwor se ya, ago dugo

naon na turun isoluwig mel fidian ilasa yan kuai te irupei a. ³⁴ Agog Jesus igo ibol irupei, “Nanug pein, onsigane ilo rumok iginiog uyan lasa ya. On ka ilo maror lo wau a, agod onjane subam itout yau geig a.”

³⁵ Ago dugo Jesus ru an ibol yau onj di imado dugo, tamol ta Jairus san ab lo yak ru diganeg Jairus san na yaug ago dubol durupei, “Onjane nanu pein imat la ya. Gidad, girek manjau aen ta utog na wa.”

³⁶ Ak gug Jesus injsad ru an patun ipanig, Jairus irupei, “Onj urer umoi. Nek ilo lo rumok mi wa.”

³⁷ Agog Jesus tamolpein fidian njen aban diri wan o imoi a, nek Pita, Jems agod in tein Jon, nujod utol anami in dida diau a. ³⁸ Diaug, ubou ab gurman san ab ate dilasa dugo Jesus malan yaug tamolpein tinan mugurun tubun kasik diganeg dumado dugo yil a. ³⁹ Saen ab ilon lo iladu man, irupidaig ibol, “Anj ata wo tinan aru agane dugo lilijan dam tubun geig agane dak i? Nanuk en ta imat na ya. Tia, in njion mi yabi da.”

⁴⁰ Ago ibol man disel go kukok an digane ya.

Gug Jesus tamolpein fidian ab ilon lo yan iku-daig, patun fo dilasa diau dugo, nanuk an tinan taman, agod megeloum a in da dumado yan, injal go dida galun a nanuk yen dan lo diladu ya.

⁴¹ Jesus pein bakan an banin te yabig, Arameik ru lo igo ibol, “Talita koum!” Ru an fun man “Pein bakan njurupaio da, masa!” ⁴² Ago ibol dugo gamu nam nanuk pein an imasag itor. In pein bakan, injsan ananjar 12 a. Aria, in kulob an dile man durut saian geig a. ⁴³ Agog Jesus nanuk tinan

taman an kudod yabig irupidai, “Ru mel en ninen o tamolpein aenta ta arupidai na wa!” Agog nanuk an anan dupanip yani wo irupidai a.

6

Profet ta yañan aman tia ya

Mat 13:53-58; Luk 4:16-30

¹ Aria, Jesus in megeloum adi dida panu an dubuseig inñinan panu Nasaret na dumul diau a. ² Ubou nal idu dugo Jesus siganed ubou ab lo iladug tamolpein naod na Anut san ru ifulale pidinai se ya. Tamolpein wei mi inñan ru dulon go durut saian a. Agog nug dusumiani ila iso dugo igo dubol se, “Aben dugon te mok tamol en mel en fidian inane yak i? Manau e in lo yen den dugon te inane yak i? Ale, kulob e banin nam igane na yen man tubun geig a! ³ Ak man tamol en talon uyanan a, en ab bek tamol amaiak i? En Maria san nanun a. Inanen tein muroun man Jems, Joses, Judas agod Saimon. Inanen lun muroun id lulonad lo dumado da.” An lo in Jesus saian dupani a.

⁴ Gug Jesus igo ibol irupidai, “Profet ta tamolpein aenta sad malad lo yañan aman tia yak ago ta itor na da. Tia geig a. Ak gug nek inñinan panu lo, inñinan muroun muroun lulonad lo, agod inñinan ab lo dam, atna mi in yañan aman tia ya.” ⁵ Man ninen o Jesus ante kulob dabai anda yak ta igane san ta idaisuda na ya. Nek talpein kisaek kisaek subam amad da yak tinid fo banin iganeg ikubuniaia a. ⁶ Ago dugo in tamolpein ilo rumok amad tia yan ninen o irut saian geig a.

*Jesus megeloum 12 idinaig panu panu diau a
Mat 10:5-15; Luk 9:1-6*

Agog Jesus inſiganen panu ibiseig gidigheid yang panu panu itor dugo tamolpein ipitenjanai se ya.

⁷ Agog Jesus inanen megeloum 12 inſan na dupalu wo igiai a. Dususag Jesus tamol adi emaiak in wagen lo ur saiak adi tamolpein tinidi ilon lo yak dukudaip diau san dabal ipidinai a. Agog itarpasaig fun iganeg uraru uraru mi idinaig diau a.

⁸ In gamugo diau dugo kududod yabig irupidaig in gidad turen yabek san biouſ ta disini na wa, nek makud mi a. Ak man latamad tia, badam tia, moni inſad let lo dam tia, ago turen diabi wa. ⁹ In ka sendal njed fo didiri wa, ak man yamel taidam titired lo didiri san geg ipidinai a. ¹⁰ Agog in ibol irupidai, “An aben dugon te ab ta lo aladu wan, ate mi ab an san tamolpein dida amado yau nap panu an abisei wa. ¹¹ Agod panu ta ate ta diſilian uyan dop anſam ru dam duloſ o dumoi tap, saen abisawai o dop, niemi apiltip san gufgaf panu an ate idu dop dile wa. An man kob ta murnap inaned ilo rumok tia yak san naon in mok diſane wak igo ya.”

¹² Ru an ibol itout dugo megeloum adi nunod uraru urarum dufufurak go diau a. In panu panu ate tamolpein igo durupidai se ya. “An ananem saian an fidian patum apanip ilom ibilisa wa.”

¹³ Agod in ur sisaiak tamolpein tinid lo yan wei mi dukudaig diau se ya. Ago dugo guren kitek nam tamolpein wei mi subam amad da yan tinid fo dububunig lo dukubunia a.

*Herod in Jon suguek san ifuni imat a
Mat 14:1-12; Luk 9:7-9*

¹⁴ Kiñ Herod in melmel e Jesus san megeloum adi digane se yan niñen o ilon a. Man dugo, nal an lo man Jesus san yanak tamolpein malad lo tubun geig ilasa la ya. Ta dubol, “Suguek san Jon in tamolpein dumat la yak lulunad lo fon imasag kumaen imado da, nek fun amaiak niñen o dabai funfun en tinin ilon lo urat digane da.”

¹⁵ Gug aenta dubol, “En man Elaija.” Agod aenkadi dubol, “In man profet ta mi a, nek ibol profet adi wagam san igo mi a.”

¹⁶ Ak man saen Herod in Jesus ata kulob igane idu se yan san ru ilon man igo ibol, “Jon man bo buron n̄tartig imat la yak gug fon kumaen imasa da ya.”

¹⁷ In ago ibol a, man dugo, imug mi in yu tamol adi idinaig Jon diabi wo diau a. N̄ien banin dusubanig subanek ab lo digane ya. Man ata wo? Herod in̄anen tein Filip san iwon, yan̄an Herodias, ilo uyan ipani san niñen o in Jon subanek ab lo igane ya. Imug mi Herod pein en in̄san tein banin na in̄aneg in da nug diñane ya. ¹⁸ Gug Jon in Herod ru en irupe, “On̄sigane tei san iwon da ator tap, on̄ kubiaen ta uri pani na da.” ¹⁹ Amaiak niñen o Herodias tiñan saian go Jon lo siai iganeg imado na ya. In Jon ifuni imat o ilon tubun mi yen a, ak gug in̄sen mi ago igane san ida ta isuda na ya. ²⁰ Man dugo, Herod Jon niñen o tubun mi irer se ya. In ilon ak Jon in tamol itaot di gun a, an niñen o talpein ta Jon muruan ipani san niñen o iparfutani fufei na ya. Nal wei mi in Jon da diñin̄en go Herod

ilo uyan lo inanen ru ilon se ya. Ak gug ilon weiwei dugo ru fun ilon uyan san tia ya.

²¹ Nal ta idu man dal ta Herodias idinaip Jon dufuni imat san an ilasa ya. Nal a Herod san tinan gubak mi igansi an san saen ilasa ya, an lo Herod soubul igane ya. In ru iganeg inanen gabman gurman adi, yu tamol unbiek adi, agod tamol adi malan te yak Galili distrik lo yan, fidian dupalup anan diani wa. ²² Aria, anan diani dugo Herodias nanun pein iladug naod na isuluwai se ya. Herod inanen turan dida dile dugo malad bulbal dugo ilod tubun mi uyan a. Man ninen o kin Herod nanuk pein an irupe, “On mel dugon ninen o ilo ibol tap, on ka sumianag dop nai nupano wa.” ²³ Agog ru lak na geig nam inanen ru dabai ipanig ibol, “On ata mel ninen o sumianag, gidad naisag kagin panek aben nibitip wadan nupano san sumianag a, nai ka nupano mok a.”

²⁴ Agog pein baras an yaug, tinan isumiani, “Nai ata mel ipanag o nsumiani wak i?”

Agog tinan awan yabig ibol, “Suguek san Jon san kabunan.”

²⁵ Agog pein baras an ririan yaug kin san na ilasag irupeig ibol, “Nai ilog man on gamu nam ru ganep suguek san Jon in san kabunan daeg fo diganep disini dupalup dupanag a.”

²⁶ Herod ru an ilon go ilon muruan tubun mok a. Ak man ru lak na geig an gubak mi ibol ilasa la ya, agod inanen turan adi malad lo in san awak aban ipani an ninen o dam, awan ibilisa wo ilon ta yen na ya. ²⁷ Ago tag in ririan yu tamol ta talpein ifuni imat san an idinig yaup suguek san

Jon buron itartip isini ipalu wo ibol a. An lo yu tamol an yaug, subanek ab ilon lo Jon buron itartig, ²⁸ kabunan daeg lo iganeg isini ipalug pein baras an ipani a. Agog in isini yaug tinan Herodias ipani a. ²⁹ Saen Jon san megeloum adi mel en dulon man, dupalug tubabun dijaneg disini diaug mutou lo digane ya.

Jesus tamol 5,000 ifutuwai a

Mat 14:13-21; Luk 9:10-17; Jon 6:1-14

³⁰ Aria, saen Jesus san megeloum adi turen dia-big itout go dumul diaug Jesus dida dutumanig kulob funfun digane, agod pitenanek a tamolpein dupupidai an da, naon na dubol idu ya. ³¹ Ago dugo nal an lo man tamolpein wei geig Jesus megeloum adi dida sad na diau dumul on dugo in dunuai anen tia ya. Man ninen o Jesus in megeloum adi irupidai, “Id tumasap, aben ta tamolpein an tia yak ate taup, idsed kisaek dop kitek yaes tabal a.”

³² Ago ibol tag wog lo disidag, aben ta yoitout tamolpein an tia yak ate yaes dubal o diau a.

³³ Ak man tamolpein panu fidian lo yan malad yaug dil dulon, ago yan lo wei mi dumasag njed nam dumaspalu on you dulubanig, dumug diau silatik on go, lon a Jesus inanen megeloum adi dida disasau wo yan ate dilasa ya. ³⁴ Saen Jesus wog ibiseig lon na idu man, doup malan tubun an afon yil a. Agog in ilon imujanai a, man ata wo, tamolpein an nek ibol sipsip titianek tamol amad tia yak igo won a. Ago tag imasig imado dugo mel wei mi ipitenanai se ya.

³⁵ Ru dulon dugo yaug gurai isi dugo, in san megeloum adi san na dupalug ago dubol, “Aben

en yoitout a, ad dam idu yau la ya. ³⁶ Man niñen o tamolpein en dinaip dufurak pe gidigheid diaup aben sinired na yan san panu te anañ didad pe diani.”

³⁷ Ak man Jesus awad yabig igo ibol, “Anj mel ta apidinaip diani.”

Agog in dubol, “Mañ tamolpein ago yak bret madad pe mufutai san ta idaisuda na ya. Mañ fidian kalam 8 urat miganep* moni idaisuda miñane gup, bret idaisuda mi madad a.”

³⁸ Agog Jesus isumianai, “Anj bret sapita da yak i? Aup ale.”

Agog diaug dileg dumul dupalug durupe, “Kafen, agod iy uraru a.”

³⁹ Agog Jesus tamolpein an irupidai, “Anj sem ibitan pe warou wei mi alasap gafurfur fo amasip amado.” ⁴⁰ Ago tag in sed ibitaig doup kitek wei mi dilasa, aenta talpein 50, aenta 100, ago dumasig dumado se ya. ⁴¹ Agog Jesus bret kafen agod iy uraru an inaneg, kumaen panu banen lo malan yabisag, ilo uyan ru Anut ipanig bret an yafute idug megeloum adi ipidinai a. Agog inanen megeloum diñaneg tamolpein duwae pidinai a. Nek ago mi iy uraru an igile kititik go megeloum ipidinaig diaug tamolpein dupidinai a. ⁴² Ago dugo in fidian mi bret an diani dugo fidian luad ipuk. ⁴³ Aria, dunuai itout gug, megeloum adi dumasag, anañ wadan ta diani na yan dutumanig, sareg 12 anua. ⁴⁴ Tamol a dunuai an dusutai man 5,000 a.

* **6:37:** Grik sad moni lo man, 200 denari.

*Jesus in you aten fo itor a
Mat 14:22-33; Jon 6:15-21*

⁴⁵ Aria, saen anan dianig itout man, Jesus inanen megeloum adi gugurut ipidinaig, in wog lo disidap you aen ate panu yan an Betsaida na dumug diau wo irupidai a. Ago dugo in sen man imadop, tamolpein an fidian idiraip dufurak in signed na dumul diau wo, ago irupidai a. ⁴⁶ Saen tamolpein idinaig diau pasik man, in sen mi did fo Taman san na igudani wo isuda ya. ⁴⁷ Saen tidom idu man, wog an mayau na iyawai se ya, ago dugo Jesus in tan na sen kisaek imado ya. ⁴⁸ In malan yaug megeloum adi maeg diganeg dufulani dugo yaes ifu dugo yil a. Man dugo, tim tubun ifure dugo naod yabi se ya. Saen salso idu man, in you aten fufo sad na yau a. In irinani o ilon yen manon a. ⁴⁹ Ak man saen inanen megeloum adi Jesus you aten fufo itor dugo dile man, in tamol nutun ta dile ago dubol dugo disasai a. ⁵⁰ Man dugo, in fidian Jesus ago dile an lo tubun mi direr dugo dusuruwor se ya. Ak man Jesus irupidaig ibol, “Dabai anane, en naiseg, arer amoi!” ⁵¹ Agog yaug wog fo isudag dida dumado dugo tim ifure yan itout a. Megeloum adi ago dileg durut saian dugo ilod weiwei geig a. ⁵² Ata wo? Jesus enti mok an dulon uyanan an ninen o ilod itau a, in bret lo kulob igane an dile yak gug kulob an kankan Jesus ninen o ta ipidinaig yan na ya.

*Jesus Genesaret na subam adi wei mi ikubuniaig
a*

Mat 14:34-36

⁵³ Aria, saen Jesus megeloum adi dida you aen ate dupalu man, tan titin yan an Genesaret dubol

dan ate lonj na disasau a. ⁵⁴ Inj wog lo dudu dugo aben an san tamolpein malad yaug ririan Jesus dile dulong a. ⁵⁵ An ninjen o dumasag dumaspalu onj gidigheid diau dugo ru duwae se ya. Agog tamolpein wei mi inj talpein subam amad da yak kapal fo dien dan dusug aben dugon te Jesus imado den ate dijal diau se ya. ⁵⁶ Ago dugo aben dugon te Jesus yaug ilasa yan, taun tubun ak boi, tia panu tubun ak boi, tia, kititik ak boi, ate inj subam adi kapal fo dusug didaen aben lo didiraisig dien se ya. An lo Jesus sumeik isusa dop dusumianip injanen yamel bitinjen mi ka diabi dile wa. Agog talpein a diabi dile yan fidian mi, Jesus ikubuniaig uyad isusa ya.

7

Mel ikokan, agod ta ikok naya

Mat 15:1-9

¹ Aria, saen Farisi adi, kubiaen san girek manjau aenta dida Jerusalem na dupalu man, Jesus dulubanig, ² Jesus san megeloum aenta, banid nun anda yak dida anan diani se yan dil a. Injened tamol kagin igo ibol, inj banid dufulanip ikok ilasa gup anan ka diani wa. ³ (Man dugo, injened kagin igo ya. Farisi adi, agod Juda adi fidian mi dam, inj imug mi banid dufulani gup anan diani wa. Inj ta dufulani na tap, inj dida anan ta diani na wa. Dal an lo inj tubud baged sad tamol kagin diri dupani na yan ago mi inj dam duri da. ⁴ Agod saen didaen aben dibiseip siganed ab lo diau duman, inj anan ta diani na wa, tia, inj dusug pe tinid ikok gup anan diani wa. Tamol kagin aenta wei kasik dam inj kagin dupani da. Nek ibol gab fulanek, bod daeg

fulanek, agod mel san kapen sensen bras nam digane yan, mel igo yan fidian ninjedi wo tamol kagin yen da.)

⁵ Aria, Farisi adi in kubaen san girek manjau adi dida awad dutumanig Jesus dusumiani, “En ata wo onane megeloum adi in tubud baged sad tamol kagin iri panim ago ta dutor dumado na dak i? Inaned banid ikok tia yak ate anan diani da.”

⁶ Ago tag Jesus irupidaig ibol, “Aisaia in profet ru itaot mok an balek uraru adi ninjemi wo ibol ilasa ya. Girek igire yan igo ya,

‘Tamolpein en awadi nam yanag diabisa da,
ak man bubedi man asau geig nai lo yen da.

⁷ In sen kawan nai ubou ag dile da,
man dugo, pitejanek a tamolpein durupidai
dan man nek tamol insiganed ilo sou mi a.’

⁸ Ru kubaen Anut gubak mi ipan an, absukali dugo tamol kagin an mi abi dabai da.”

⁹ Agog in fon irupidaig igo ibol, “An lulunam lo kagin igo yak yen da. An ru kubaen Anut ibol an gigin na agansi, an lo ansiganem tamol kagin ari apani da. Agod an ilom lo kagin en uyanan geig ago abol da! ¹⁰ Gubak mi Moses igo ibol, ‘Onane tina tama awad paen na mado dop kagin pidinai o uyanan a.’ Agod, ‘Ta in awan nam tinan taman imisilanai tap man, dufuni imat a.’ ¹¹ Ak man an abol, ‘Tamol ta taman boi, tinan boi, igo irupe, mel ta ate nai ka njibinawo san ninjen o man Korban’ (ru an fun man, Anut mel an njen njupani la ya), ‘an ninjen o man, o kabel, nai mel an njupanan san tia ya.’ ¹² An lo tamol an fon binawek ta tinan taman ninjedi wo igane pidinai san an ta alefuni na wa.

¹³ Dal emaiak lo, ananem tamol kagin tamolpein duri dupani wo abol den lo mi, an aganeg Anut san ru an nunon tia ya. Agod mel wei mi taidam naok nek ago yak agane da.”

Jesus ata mel tamol ilon lo nun ipani wan ninjen o ibol ilasa ya

Mat 15:10-20

¹⁴ Agog Jesus in fon tamolpein fidian sinjiren na dupalu wo igiai a. Dupalug, ru ago ibol irupidai, “An fidian kududom agurep, ru en nabol dop, alon fufei wa. ¹⁵⁻¹⁶ Tamol ta mel kuai tep tinjaen lo yau dan nun ta ipani na da. Tia, mel tinjaen lop awan lo ilasa damaiak tamol ilon nun ipani da.”

¹⁷ Jesus tamolpein tumanek an ibisawaig ab lo iladu man, inanen megeloum adi ru fajan en ninjen o dusumiani a. ¹⁸ Agog in isumianaig ibol, “Ak dugo, an dam an alon san tia i? An ta ale na yak, mel ta tamol tinin kuai fo yak, tamol ilon yaup iganep nun ilasa san tia yan alon ak i? ¹⁹ Man dugo, mel an buben lo ta yau na ya, tia, tinjaen lo yaug dubei san dal irig ilasag itout yau a.” (Jesus ru emaiak ibol an lo anan fidian nuaen san uyan ak ago ibol a.)

²⁰ Agog ibol on, “Mel a tamol ilon lo yen dugo kuai te dilasad amaiak tamol ilon nun ipani da.

²¹ Man ata wo? Mel naok naok emaiak tamol ilon lo dien den, in buben mok ilon lo yak kuai te dilasa da, kankan saiak, jeit kagin, gumagam kagin, tamol ifuni imat dak, turan iwon ida dien dak, ²² mala sek kagin, nun kagin, siai kagin, uf ru, se pitiano i kagin, agod burau kagin. ²³ Mel saiadi

emaiak fidian talpein ilon lo yak kuai te dilasa da, nek mel amaiak mi talpein an ilon nun ipani da.”

Gob pein ta san ilo rumok

Mat 15:21-28

²⁴ Ago gug Jesus imasag, aben an ibiseig, gob adi sad taun tubun ak uraru, Tair Saidon da sad lubanek lo yaug, ab ta lo isidag, ante kitekan yaes ibal a, ate tamolpein ta san turenj duloj man imoi a. Ago bo man inj mianuk lo imado san tia ya.

²⁵ Pein ta injanen nanun pein ur saiak anda yak inj ru tim Jesus ante imado dan ilonj a. Ririan imasag Jesus san na ipalug, naon na turun isoluwi a.

²⁶ Pein en man Grik, agod distrik tubun ate imado dan Siria provins, agod titin ta dugon te tinan igansi an aben ta lonj sinjiren na yañan Fonesia dubol da. Aria, Jesus naon na turun isoluwig, Jesus inj nanun pein tinin lo ur saiak ikudip yau wo ilo munjanek ru lo isumiani a.

²⁷ Inj pein an irupej, “Umoi dop, nanuk ata diani wo dumat dan malmalan diani wa. Man nanuk adi sad ananj minjanep gown adi diani wo sad na mabal tap, an ta uyan na wa.”

²⁸ Ak man pein an awan yabig igo ibol, “Awo, tamol Tubun en ubol mok da. Gug gown dam badim paen na dumado dop, nanuk sad awad aban idu man ka diani wa.”

²⁹ Ago tag Jesus ibol, “Ru en rupaiag ak ninen o ka wau a. Ur saian an onjane nanu pein tinin lo yak ibiseig yau la ya.”

³⁰ Agog inj sinan ab lo yaug nanun pein gadab fo yen dugo ile, agod ur saiak dam ibiseig yau a.

Jesus tamol ta kududon awan da itau ak ikubuneya

³¹ Aria, Jesus fon imasag, Tair lubanek ibiseig, isidag yaug, taun tubun ak yañan Saidon ante ilasa ya. Agog aben an ibiseig, imul idug yaug “Ten-Taun”^{*} lubanek lo ilasag, You Galili sinjiren na isusa ya. ³²Ante man tamol ta kududon ipakuk agod balen muruan ak diñaneg Jesus san na dupalug, banin tamol an tinin fo igane wo dusumiani a.

³³ Agog Jesus tamol an inñaneg, ida tamolpein malan tubun an dibisawaig gigin na nuñod uraru diau a. Ante gug Jesus inñen banin kikoun tamol an kududon anenaim lo isousoug sen banin fo ilusug, ate tamol an balen yabi ile ya. ³⁴ Agog Jesus naon yabisag malan lak na isida dugo yaes yabituani gug tamol an irupeï, “Efata.” (Ru an fun man: upuk.) ³⁵ Ago ibol go tamol an kududon uyan ilasag balen dam pasauman go ru ilon go inñen uyanan se ya.

³⁶ Jesus ru dabai anda nam mel a dile yan tamolpein aenta ta durupidai na wo ibol. Ak man urat wei kasik igane yan lo urat an san ru dam tubun mi diñen ila iso se ya. ³⁷ Ru an dulon go durut saian geig a. In igo dubol, “Tamol en mel fidian igane man uyanan geig ak mi a. In iganeg tamol ta kududon ipakuk an ru ilon ak, agod tamol ta awan itau an ru ibol a.”

8

Jesus tamolpein 4,000 ifutuwai a
Mat 15:32-39

^{*} **7:31:** Dekapolis

¹ Saen an lo tamolpein malan tubun mok fon Jesus san na dutumani a. Dumado dugo inaned anan latamad diani pasik a. Ago tag, Jesus inanen megeloum adi dupalu wo igiai a. Agog dupalug dilasa dugo Jesus irupidai, ² “Nai tumanek tubun en ilog imuḡanai da, man dugo, gamu nal utol yau la dugo in ḡai da mumado na ya, ak gug anan ta diani san etna tia ya. ³ Nai in ḡidinaip dimatigen on inḡiganed na diau tap, dal na rei ifu dop malad itilani wa. Agod aenta dal asau geig dupalu ya.”

⁴ Inanen megeloum adi awan diabig dubol, “Aben yoitout en lo tamol ta, ka dugot na bret idaisuda inaned lo tamolpein en ifutai ak i?”

⁵ Agog Jesus isumianai, “An anan bret sapita yen di?”

Agog dubol, “Bret seven mi a.”

⁶ Agog Jesus tamolpein an tan na dumasi wo irupidai a. Agog in bret seven an inaned, Anut ilo uyan ru ipanig, yafututeg, megeloum adi tamolpein duwae pidinai o ipidinai a. Agog diaug bret duwae ya. ⁷ Iy kititik kadi in dida dien a. An lo Jesus iy an inaned, Anut ilo uyan ru ipanig, megeloum adi irupidaig iy en dam tamolpein duwae pidinai o diau a. ⁸ Aria, tamolpein anan an dianig idaisuda geig a. Diani itout gug megeloum adi dumasag anan samsamun dutumanig sareg seven lo ditaneg awad isa ya. ⁹ In tamol adi a dumado yan dusutai man 4,000 igo ya. Agog didinaig dumul diau a. ¹⁰ Agog Jesus megeloum adi dida wog lo disidag, Dalmanuta distrik ante diau a.

Jesus kulob girager ta igane wo dusumiani a
Mat 16:1-4

¹¹ Ante man Farisi adi dupalug Jesus dusumiani wo fun digane ya. In ilod man Jesus bitinaek lo digane wo ago yen se ya. Amaiak ninen o in kulob kumaen panu san ta kob igo won igane dop dile wo dusumiani a. ¹² Jesus in sad ru an ilon go in sen n t un ilon lo yaes yabitanig igo ibol, “Ata wo an tamolpein gamu e amado den kulob girager ta kob igo won ngane dop ale wo ilom yen dak i? Nai ru rumok nrupaian da, kob naok igo yan nai ta npanan na wa.” ¹³ Agog in ibisawaig, megeloum adi dida fon wog lo disidag, diaug, tan aen ate dilasa ya.

Farisi adi in Herod da sad yis
Mat 16:5-12

¹⁴ Aria, megeloum adi ilod inaon go bret ta disini na ya, wog lo man bret kisaek o lian yen a. ¹⁵ Jesus ru kagin ipidinaig ibol, “Kagin agane, Farisi sad yis, agod Herod san dam ninen o kagin agane uyanan a.”

¹⁶ Megeloum adi ru an dulong go in sed mi ru an san fun mok kuai dupani wo nug lo dininon ila iso se ya. Agog dubol, “In ago ibol man fun, man bret amama tia ya.”

¹⁷ Jesus megeloum adi dugo dubol se man ilon, ago tag isumianai, “Ata wo an bret amam tia yak ninen o nug lo akubiai dak i? Ak dugo, an nen ta ale alon na yak i? Ak dugo, an kankan amam tia i?” ¹⁸ An malam da ya, ak gug an ta ale geig na da. Nek ago an kududom da ya, ak gug an ta alon geig na da. Mel en ilom inaon ak i? ¹⁹ Saen nai bret kafenda

ɲafututeg tamol 5,000 ɲufutuwai an, an sareg sapita lo anan samukan atane yak i?”

Inj awan diabig dubol, “Sareg 12.”

²⁰ “Agod saen ɲai bret seven ɲafututeg tamol 4,000 ɲufutuwai an, an sareg sapita lo anan samukan atane yak i?”

Agog dubol, “Seven.”

²¹ Agog inj ibol, “An gamugo alon uyan dak i?”

Jesus Betsaida na tamol malan itau ak ikubune ya

²² Jesus inj megeloum adi dida panu yaɲan Betsaida ante diaug dilasa ya. Ante tamolpein ta inj tamol ta malan itau ak diɲaneg dida Jesus san na dupalu ya. Inj Jesus banin nam tamol an tinin yabi ile wo dugudani a. ²³ Agog Jesus inj tamol an banin te yabig, ida panu an dibisei a. Agog Jesus tamol an malan fo ilusug banin tamol an tinin fo iganeg isumiani, “On gamu aban ka ule dak i?”

²⁴ Agog tamol an malan yabisag ibol, “Awo, ɲai tamol ɲeil da, ak man malag lo ai ditiliani dak igo mi a.”

²⁵ Agog Jesus afon banin malan fo igane ya. An lo tamol an malan tubun mi ipuk go uyan isusag mel fidian ile fufei a. ²⁶ Agog Jesus tamol an sinan ab lo yau o idinig irupe, “On itaot sigane ab lo wau, panu lo ta ladu na wa.”

Jesus inj Kristus an, Pita kuai te ibol a

Mat 16:13-20; Luk 9:18-21

²⁷ Agog Jesus inɲan megeloum adi dida panu an dibiseig dal diɲaneg panu kititik taun Sisaria Filipai lubanek lo dien dan ate diau a. Dal te turen

diabi dugo inſan megeloum isumianai, “Tamol adi inſan ſai enti mok ago dubol di?”

²⁸ Agog inſan durupe, “Aenkadi onſan Suguek san Jon ago dubol dak, aenta onſan Elaija dubol dak, aenta onſan profet ta ago dubol da.”

²⁹ Inſan isumianai, “Ak man anſem ſai enti mok ago abol di?”

Pita awan yabig ibol, “Onſan Kristus.” ³⁰ Agog Jesus ru kagin ipidinaig ibol, “ſai enti, aenta ta arupidaip dulong na wa.”

Jesus imat san nal sumeik ak ago irupidai a

Mat 16:21-23; Luk 9:22

³¹ Saen an lo Jesus fun iganeg inſanen megeloum adi ipitejanai man, Tamol Nanun inſan madai wei mi ifuni wa, agod ubou san matu adi, pris gurman adi, agod kubiaenſan girek manau adi inſan fidian Tamol Nanun patud dupani wa. Ago dop inſan dufuni imat a. Ak gug nal utol gup inſan fon imasap kumaen imado da wa. ³² Jesus ru an kuai te ibol irupidai a. Ago tag Pita inſan ida gigin na diaug ru dabal nam Jesus ipei a.

³³ Ak gug Jesus idanſag Pita patun ipani dugo naon megeloum aenta ipidinaig dugo Pita ipei ibol, “Satan, onſan patug fo lasa wau! Man dugo, onſan Anut san ilo girek ta uri pani na da, tia, onſan tamol adi sad ilo girek an mi uri pani da.”

Idſiganed aigim tisinip Jesus nien aban tiri wa

Mat 16:24-28; Luk 9:23-27

³⁴ Agog Jesus tamolpein igiaig, inſan megeloum adi dam kisaek mi dutumanig, igo ibol irupidai, “Talpein ta ſai nſan aban iri wo ilon ibol duman, inſan gidad sen yabi idup inſan aigim isinip nſan aban

iri wa. ³⁵ Man ata wo? Ta inşinan madok iganep uyan ilasa wo ilon ibol tap, inşinan madok mok an ideg yau a. Ak man ta inşinan madok ŋai niŋeg o, agod bilaluŋ uyanan ak niŋen o ibisei tap, inşanen madok mok patun ipasi dop yen yau a. ³⁶ Man dugo, talpein ta tan en san filian fidian mi inşane dop, inşanen naon man inşinan madok mok malan isue tap, en dugo woŋ pe uyan ak i? ³⁷ Ak dugo, inş ata mel tan en san, inşanen madok nuŋon ak inşane imul san ka ipani waki? Mel ta igo yak yen man tia geig a. ³⁸ Tamolpein ensauta gamu dumado den aupasek agod kagin sisaiak san saen lo dumado da. Talpein ta saen en lo ŋaisag ru niŋen o miai ifuni tap, saen ŋaineg eŋel gun agod Tamag san girager da ŋupalu dop, ŋai nek ago mi talpein an niŋen o miai ifunag a.”

9

¹ Agog inş ru ibateg igo ibol irupidai, “Rumok ŋurupaianŋ da, aenta ebo dutur den gamugo dumat dop, Anut san kagin panek an dabai aman da ipalu dop dile wa.”

Jesus tinin ibilisag ilalanŋ a

Mat 17:1-13; Luk 9:28-36

² Aria, nal 6 yau la gug Jesus inş megeloum utol, Pita, Jems inş tein Jon ago inşal go dida did tubun ak ta ate disida diaug sed dumado se ya. Ante dumado dugo Jesus inş malad lo tinin ibilisag ilalanŋ idu dugo dile ya. ³ Ago dugo inşanen yamel isapudadeg milkouk nuŋon geig ilasa ya. Milkouk an talpein ta tan en lo yamel marasin nam ifulanip ago ilasa san tia yak ago ya. ⁴ Ago dugo malad lo

dam Moses in Elaija da dilasag, Jesus dida dutur go dinjnen se yan megeloum dil a.

⁵ Agog Pita Jesus irupeig ibol, “Girek manau, nek uyanan geig man dam e mumado da! On ubol tap, lalai utol ente mabi wa, onane kisaek, Moses anen kisaek, agod Elaija anen kisaek dam mususe wa.”

⁶ (In fidian tubun mi direr dugo dusuruwor se yan lo, Pita ru dugo ibol an ta ilon uyan na ya.)

⁷ Agog timtaen* ta idug yafutanai dugo awak ta timtaen an ilon lo ilasag ago ibol, “En man naineg Nanug, nai bubeg mok a. Awan alon!”

⁸ Ago dulon dugo malad yau imul silatik on dugo aban dile itililani se yak gug tamol aenta ta dil na ya, nek Jesus mi sen kisaek sinjired na itur se ya.

⁹ Saen Jesus megeloum dida did an dibiseig dumul dudu dugo, Jesus ru dabai anda ipidinai a. “An aup mel e ale yan njnen o tamolpein aenta ta arupidai na wa. Amoi dop Tamol Nanun imat pe mutou lo fon imasap kumaen imado dop, saen an lo mel e ale yen ka abol ilasa wa.” ¹⁰ Ago tag in ru mel en njnen o inanen ilo girek lo dutueg yen a, ak man in sed nug lo dinjnen se ya. In nug lo dusumiaen ila iso, “Ru e mutou lo fon imasa wo ibol en fun mok dugo yak i?”

¹¹ Agog in Jesus dusumianig igo dubol, “En ata wo kubiaen san girek manau adi in Elaija imug ipalu gup ak ago dubol di?”

¹² Jesus awad yabig ibol, “En man ru rumok a, Elaija imug ipalup, mel fidian ikubuniaip imug dien ago mi dilasa wa. Ak man ata wo ru en digire yak i? Tamol Nanun tubun mi madai isini

* **9:7:** Kakao

dop patud dupani wa. ¹³ Ak gug ηai ηurupaianj da, Elaija ipalu la ya. Ago dugo insiganed ilobol lo saian dupani se ya, nek ibol girek ta inj ninjen o ibol ak ago mi ilasa ya.”

*Jesus pinein ta ur saiak aman da yak ikubune ya
Mat 17:14-21; Luk 9:37-43a*

¹⁴ Saen Jesus inj megeloum utol an dida dumul go megeloum aenta sad na dilasa man, tamolpein malan tubun ak dutumanig dumado dugo dil a. Ago dugo kubiaenj san girek manjau aenkadi megeloum adi dida ru lo nug diabi dugo dil a.

¹⁵ Agog tamolpein fidian saen Jesus dile man durut saian go ririan dumaspalu onj Jesus san na dupalug ilo uyan lo duyujani. ¹⁶ Agog Jesus tamolpein isumianai a, “Anj kubiaek dugomaiak nug lo anjinej ila iso di?” ¹⁷ Agog doup an lulujad lo tamol ta awan yabig igo ibol, “Girek manjau, ηaineg nanug ur saiak anda yak onsa na ηisini ηupalu ya. Man dugo, ur saian en iganeg awan itau a. ¹⁸ Aben tata lo itor dop, ur ifunip ibili idu dop, awan lo subalbal ilasap, luon igurmip tinin ikikaip ti ibol yen da. Man ninjen o ηai onsa megeloum adi ur saiak an dukudi wo ηusumianai, ago bo man inj digane san tia ya.”

¹⁹ Inj ru naon irupidaig igo ibol, “Anj ilo rumok amam tia, nal sapta ηai anj da tumado wak i? Nal sapta muruan apanag dan ηisinip yau ak i? Nanuk an igo anjane apalu.” ²⁰ Inj pinein an diηane dupalu ya. Saen ur saian inj Jesus ile man, silei nam pinein an ifunig itarfunig ibili yau idug, tan na idududuruk dugo itububuluk yau imul dugo subalbal awan lo ilasa se ya.

²¹ Jesus pinein an taman isumiani, “Nal sapita kagin an inĵ tinin lo ilasa yak i?”

Taman awan yabig ibol, “Saen inĵ nanuk tusan lo mi kagin en iganeg ipalu ya. ²² Nal wei mi ur saiak en ifunig daonĵ ipani dop yai lo, agod you lo ibili idup ifuni imat o igane se ya. Isop onĵ idaisudap mel ta inĵ lo gane tap, ilo imuĵanama dop binawama.” ²³ Agog Jesus taman irupei, “Ru e ‘Isop onĵ idaisudap mel ta inĵ lo gane tap’ ubol en ata wo ago ubol ak i? Talpein ilo rumok aman da man, inĵ o mel fidian mi ka ilasa wa.”

²⁴ Ago dugo taman ririan iwaginĵ go ibol, “Nai ilog lo rumok. Nai binawag dop nĵaisag ilog yau imul dan nĵabi idu!”

²⁵ Saen Jesus tamolpein wei tinan dumaspalu onĵ dutumani se yan yil man, inĵ ur saiak an ru sakar nam ipeig igo ibol, “Onĵ ur saiak awa tau san agod kududo itau san, nĵai ru kubiaenĵ nĵupano da, biseip sen lasa, fon umul tinin ilon lo ta ladu na wa.”

²⁶ Agog ur saiak an isasai saian dugo nanuk an tan fo itarfuni saian geig a, ago gug ibiseig yau a. Pinein an tan fo tubabun igo wonĵ yen, ago tag tamolpein wei mi dubol, “Inĵ imat mok a.” ²⁷ Gug Jesus banin yabig irae dugo, pinein an imasag itur a.

²⁸ Saen Jesus ab lo iladu man, megeloum adi dida sed kisaek dumado dugo Jesus dusumiani, “En ata wo maĵ ur saiak mukudi san ta idaisuda na yak i?”

²⁹ Inĵ ru naon irupidai, “Gudanek lo mi anĵ ur saiak naok igo yak ka akudi wa.”

Jesus saen uraru inſan materſ ninjen o megeloum irupidai a

Mat 17:22-23; Luk 9:43b-45

³⁰ Aria, Jesus inſanen megeloum adi dida aben an dibiseig, turenſ diabig diaug distrik Galili titiſaem diau se. Saen ante diau man Jesus tamolpein aenta duloſ o man imoi a. ³¹ Ata wo? Inſanen megeloum adi ipiteſanai se ya. Agog irupidai, “Tamol Nanun inſanen ager adi sad banid lo digane wa. Inſ dufuni imat, agop nal utol yau gup, afon imasa da wa.” ³² Ak man megeloum adi ru an san fun ta duloſ uyan na ya. Taida mi, inſ Jesus dusumiani wo direr se ya.

Enti inſ talpein malan te ya

Mat 18:1-5; Luk 9:46-48

³³ Inſ Kaperniam na dilasa ya. Saen inſ ab ilon lo dumado dugo, Jesus isumianai, “Dal na anſem ata mel ninjen o nug lo akubiai yau imul se yak i?” ³⁴ Ak man inſ dutokubol dumado se ya. Man ata wo? Inſ dal na diau dugo inſsed luloſad lo enti inſ tubun geig ak ninjen o dukubiai yau imul se ya.

³⁵ Ago tag Jesus imasi dugo, megeloum 12 an dupalu wo igiai a. Saen naon na dupalu man irupidai, “Talpein ta inſ yaſan tubun ilasa wo ilon ibol tap, inſ gidad sen igane murna yau a, agod dam inſ gidad tamolpein fidian sad biabi ſilaſal ilasa wa.”

³⁶ Agog inſ nanuk nanun ta inſaneg, megeloum adi luloſad lo igunig itur a. Agog banin nam yabig ikubiaig igo irupidai, ³⁷ “Talpein enti nanuk igo yak ta ſai yaſag lo inſanep iyunſani tap, ſai dam inſiliag go iyunſanag da. Agod talpein enti ſai inſiliag

duman, ηai mi tia ya, tia, Enti ηai idinag go ηupalu yan dam inηaneg iyunηani da.”

Tamol ta id niηed o ager ta imado na dan, id turad a

Luk 9:49-50

³⁸ Jon Jesus irupeig ibol, “Girek manηau, tamol ta inη on ηaηa ibol dugo ate ur sisaiak ikudai se dugo mile ya. Ago tag man inη kulob ago igane yau o mupadau a, man dugo, inη id lo tia ya.”

³⁹ Jesus irupeig, “Anη inη abituani amoi. Man ata wo? Talpein enti ηai yaηag lo kulob dababai anda yak ta igane man, inη ririan ru saian ηai niηeg o ibol ilasa san tia ya. ⁴⁰ Man dugo, talpein enti inη id o ager ta imado na dan man id turad a. ⁴¹ An lo ηai ηurupaianη da, talpein enti inη, anη Kristus san ak niηen o you kitek gab lo iganeg aluk o ipananη dan, inηanen naon ibisei san tia geig a.”

Mel ta tamolpein aupasek digane wo iduduwai san ru

Mat 18:6-9; Luk 17:1-2

⁴² “Agod talpein ta nanuk igo yak ηai o ilon rumok dak ta iganep aupasek lo idu tap, talpein an gidad kagin igane wa. Man dugo, pat tinan buron lo disisi idup beig lo dibal pe isarir yau man bo uyan mok a. Man ata wo, an tia tap, ai wadan ηai inη ηupani wan irinηani geig a. ⁴³⁻⁴⁴ Ulonη. Onη bani turan aupasek lo udu san iginio tap, tutep ubal yau! Ago dop onη bani tia madok kumaen yen san lo ladu wo tap, an ta saian na ya. Man dugo, kabelan bani uraru mi diηiliop Ades lo yai pem-pem ided dan lo dubulo wau banau. ⁴⁵⁻⁴⁶ Agod onη ηie turan aupasek lo udu san iginio tap, tutep

ubal yau! On gidad ñie tia madok kumaen yen san lo ladu wo tap, an ta saian na ya. Man dugo, kabelan ñie uraru mi diñiliop Ades lo dubulo wau banau. ⁴⁷ Agod on mala turan iginiop au upas tap, mala an bilanip biliau a. Mala kisaek ama da madok kumaen yen san lo ka ladu wa. Kabelan mala uraru mi diñiliop Ades san yai lo dubulo wau banau. ⁴⁸ Aben ante man, 'inśad kadum ta dumat na wa, agod yai imat san tia geig a.'

⁴⁹ Nek ibol saen Anut yai digane pani man beig dam alta fufo digane yak igo won, Anut tamolpein fidian yai tinid fufo igane wa.

⁵⁰ Beig man biabi uyanan anda ya. Ak gug beig san gigen itout tap, aria dugo won tamol ta san gigen an iganep beig on ilasa da wak i? Amaiak niñen o an nugnug lo beig amam da ya, agod nug lo maror amam da amado wa."

10

Nug ñanek dututep itout san ru

Mat 19:1-12; Luk 16:18

¹ Go Jesus imasag, panu Kaperniam ibiseig, you Jordan ituteg, titin ta Judea distrik a you an aen ate yen dan lo yau a. Ante tamolpein wei mi fon inśan na dutumani a. Agod Jesus in fon inśinan kagin iri panim ipiteñanai se ya.

² Ago dugo Farisi aenta dususag dusubani wo igo dusumiani, "Idaned kubiaen dugo ibol ak i? Mel ta niñen o tamol ta inśan pein ka ibisei ak i?"

³ In awad yabi, "Ru kubiaen dugomaiak Moses ipanañ ak i?"

⁴ Inj dubol, “Moses uyan ipani a, tamol ta iwon ikudi wo tap, nug banin diabi amaiak itute san girek ta igirep, iwon ipani gup ikudi yau a.”

⁵ Agog Jesus ru naon igo irupidai, “Anj bubem pat onj an niñen o Moses ru kubiaen en igire panañ a.

⁶ Ak gug fun mok lo Anut man ‘tamol inj pein da idirai a. ⁷ Fun an niñen o tamol inj tinan taman ibisawaip iwon inañep nug dupini dupini wa, ⁸ an lo dop uraru an kisaek mi dilasa wa.’ Amaiak niñen o inj uraru ago tia ya, inj man kisaek a, man dugo Anut inñen mi itumanai a. ⁹ Ak niñen o kabelan melmel a Anut itumanai an tamol ta itute banau.”

¹⁰ Saen megeloum adi Jesus dida ab ilon lo dumado man, ru en niñen o Jesus dusumiani a. ¹¹ Inj ru naon igo irupidai a, “Tamol ta iwon ikudi yau dop pein sen ak inane tap, iwon imug ak malan lo man tamol en pein foun an da jeit digane da.

¹² Agod pein dam iwon tamol ikudi yau dop tamol sen ta inane tap, pein en dam inj jeit kagin igane da.”

Jesus inj nanuk injal a

Mat 19:13-15; Luk 18:15-17

¹³ Nal tag tamolpein inñsigned nanuk kititik diñal go Jesus san na dupalug an lo banin nam ibiai ile wa. Ak man inañen megeloum adi dipidai se ya.

¹⁴ Saen Jesus yil man tiñaen saian go igo irupidai, “Nanuk adi nñisag na dupalu wo dop eilafu wa, akudai amoi. Man dugo, Anut san kagin panek aben man nanuk ago yak sadi a. ¹⁵ Nai rumok nuñon nñurupaian da. Talpein enti nanuk igo wonj Anut san kagin panek inane tap, inj Anut san kagin panek aben ilon lo ka iladu wa. Ak gug inj nanuk

onj ilasa wo imoi tap, iladu san tia geig a.” ¹⁶ Agog inj nanuk adi injal go ilataig, banin kabunjad fo iganeg bar ipidinai a.

*Pinein damag filian anda yak Jesus isumiani a
Mat 19:16-30; Luk 18:18-30*

¹⁷ Jesus turenj yabi wo dugo, pinein damag ta imaspalu onj inſan na ipalug naon na turun isoluwig isumiani, “Girek manjau onj uya mok a, ata kubol njigane dop lo madok pempem yen yau san ka njigane wak i?”

¹⁸ Jesus ru naon ibol, “Onj ata wo njai uyag ak ubol di? Anut sen kisaek mi uyan aman a. ¹⁹ Onj Anut san kubiaenj fidian ulonj pasi a: onj ta funi imat umoi, jeit kagin umoi, ugam umoi, supalek ru ubol umoi, talpein ta rawip lo san melmel unjal umoi, agod onj tina tama awad uri pani wa.”

²⁰ Inj ibol, “Girek manjau, njai nanuk log ipalug gamu en kubiaenj an fidian njiri njupani na ya.”

²¹ Jesus tamol an malan ti ibol ile dugo buben tubun mi ipani a. Ago dugo ru en irupeia, “Onj mel taida ninjen o mi katuka mado da. Umul waup, melmel a onj da yan udad pe moni njanep, tamolpein mel ad tia ak wae pidinai a. Ago dop kumaen panu lo filia senamo geig ilasap yen a. Ago gup palup njieg aban uri wa.”

²² Tamol an ru an ilonj dugo ilon idug ilon ipa-paog ibiseig yau a. Man dugo, inj tamol filian tubun anda ya.

²³ Agog Jesus idansag malan yang megeloum adi yil dugo irupidai, “Tamolpein ensauta a filian tubun amad da yan, Anut san kagin panek aben ilon lo diladu san muruan kasik a!”

²⁴ Inanen megeloum adi ru an dulon go durut saian a. Ak gug Jesus fon ibol, “O nanug muroug, talpein Anut san kagin panek aben lo isadu san man muruan geig a! ²⁵ Tamol filian anda yak Anut san kagin panek aben lo ka iladu wak, an rumok tap, aria kamel ta si gubaran lo yau san man pasauman geig a.”

²⁶ Ru an dulon go nen durut saian a. Ago tag inşed nug ilon lo diñinş se ya, “Mago tap, enti mok patu pasek ka inşane wak i?”

²⁷ Jesus malan ti ibol go yil dugo irupidai, “Tamolpein mel en digane san ta idaisuda na ya, ak gug Anut lo mel ago man ta muruan na ya, ata wo, inş lo mel fidian man pasauman a.”

²⁸ Agog Pita ibol irupeı, “Ule man onş nşie aban muri wo mel fidian mibisei a!”

²⁹ Agog Jesus igo ibol, “Nai ru rumok nşurupaian da, talpein enti ab ibiseig, tia tein boi, tia lun boi, tia taman boi, tia tinan boi, tia nanun muroun boi, tia siganen tan boi, an nşai yanşag yabisa wo ibisei dop man, ³⁰ tan en lo Anut naon uyanan geig ipani wa. Gidad talpein an malan lo melmel a ibisawai an sinşakan geig, inşanen naon san melmel man nal 100 irinşani wa. An lo naon ago yak inşane wa. An man ab, tein taon, lun, tinan, taman, nanuk adi, abi dam fidian foun ak wei di wei mok inşane wa. Ago gug dida madai di muruan funfun dam inşane wa. Agod murnap mel fidian foun dilasa san saen lo man, inş kumaen pempem mi yen san an dam inşane wa. ³¹ Ak man talpein wei mi gamu inş malan te dan nal an lo man talpein kawan ak ago dilasa wa. Agod talpein wei mi inş tamol kawan igo dumado dan nal an lo malan te dilasa wa.”

*Jesus imat pe imasa da wak fon ipitejanai da
Mat 20:17-19; Luk 18:31-34*

³² Aria, Jesus inanen megeloum adi dida Jerusalem dal dijaneg, diau dugo Jesus imug yau se ya. In ilon Jerusalem na diau wo ago yen an ninen o megeloum adi durut saian geig a, agod tamolpein a njen aban diri dan in dida Jerusalem na diau san ninen o tubun mi direr se ya. Saen an lo Jesus fon inanen megeloum adi injal go gigin na diaug in mel dugo in lo ilasa wan ninen o irupidai a. ³³ In ibol, “Aloñ uyanan, id Jerusalem na tau da. Ante man Tamol Nanun dijanep pris gurman adi agod kubiaen san girek manau adi banid lo digane wa. In imat san ru ago duguni wa. Ago dop Juda tia yak sad banid lo digane dop lo ³⁴ kukok aman diganep, dusulanip, lubum nam dufunip murna gup dufuni imat a. Ago digane wak man nal utol gup fon imasa dap kumaen imado da wa.”

*Jems in Jon da sad sumiaen
Mat 20:20-28*

³⁵ Agog Sebedi nanun uraru an, Jems in Jon da, in dususag Jesus dusumianig igo dubol, “Girek manau, man iloma man, mel ninen dugo musumiano wo dak ago ka gane panama wa.”

³⁶ Ago tag Jesus isumianai, “Ata mel naj njigane panaj o ilom ibol di?”

³⁷ Agog in durupe, “Ru gunip, onjane girager san saen idu dop, man onjane badim fo onj sinjire na mumado wa, kisaek onj bani won ak lo dop, kisaek onj bani nas ak lo wa.”

³⁸ Ak man Jesus awad yabig irupidai, “Ata mel ninen o asumianag dan ninen o anjaonj da. Ak dugo,

gab a lo ηai ηaluk amaiak lo aluk o an idaisuda yak i? Tia, suguek a ηai ituanag amaiak dam an ituananη dop man, an idaisuda yak i?”

³⁹ In ru naon durupei, “Awo, manη idaisuda ya.”

Agog Jesus irupidai, “Rumok, gab a lo ηai ηaluk amaiak lo anη aluk a, agod suguek a ηai ituanag amaiak dam anη ituananη a. ⁴⁰ Ak man anη ηai siηireg na amado wa, ta banig won ak lo dop, ta banig ηas ak lo, aben uraru amaiak ηaiseg mi ηupananη san ta idaisuda na ya. Tia, ηaisag Tamag inηen mi tamol ta aben an ipidinai san niηen o ipilianai la ya, amaiak niηen o aben uraru an inηsadi mi a.”

⁴¹ Saen inηanen megeloum 10 aenkadi mel an dulonη man, Jems inη Jon da niηedi wo tiηaed saian a. ⁴² Ago tag Jesus megeloum igiaig inηsan na dupalu ya. Dutumani dugo ibol, “Anη alonη ak gob adi luluηad lo tamol a inηsed gurman dubol dan, sad dabai tamolpein a paed na dumado dan dukubiai pidinai da. Ago dugo inη luluηad lo tamol a yanηad ad da yan diganep tamolpein kawan ak inηaned tuod paen na dumado wa. ⁴³ Ak gug anη luluηam lo kagin ago yak ta ilasa na wa. Talpein ta anη luluηam lo inη yanηan tubun ak inηane wo ilon ibol tap, sen iganep anηanem biabi niηanηal onη ilasa wa. ⁴⁴ Agod talpein ta anη luluηam lo inη imug yau wo ilon ibol tap, sen igane idup anη fidian anηanem bigabeg urat igane pananη san ilasa wa. ⁴⁵ Nek dal kisaek an lo Tamol Nanun inηsen mi, aenta inη o binawek urat dupani wo ta ipalu na ya, tia, aenta niηedi wo binawek urat ipidinai o ipalu ya, agod dam sen ibiseip an lo tamolpein wei mi inηal san niηen o ipalu ya.”

*Jesus Bartimeus malan yafute ya
Mat 20:29-34; Luk 18:35-43*

⁴⁶ Aria, Jesus in megeloum adi dida turenj diabig Jeriko na dilasa. Saen in tamolpein malan tubun ak dida taun an dibisei man, tamol ta yanjan Bartimeus (an man Timeus san nanun) dal giranen na imasig moni dupani wo iwagin se ya. In man tamol malan itau a. ⁴⁷ Saen in Jesus Nasaret san tamol dal ante ipalu dan ago ilonj man, awan tubun mi iwagin go ibol, “Jesus, Dawid Nanun, ilo imujanag!”

⁴⁸ Tamolpein wei mi dububujanig, dubol, “Awa itaup tokubol mado!” Ak man in nen tubun mi isasai, “Dawid Nanun, ilo imujanag!”

⁴⁹ Jesus yau onj dugo wagin an ilonj tag, itur dugo tamolpein dubuluwi an irupidai, “An awagi.”

Ago tag in tamol malan itau an duwagig dubol, “Ilo wabisap, masa, in igio da.” ⁵⁰ Man ninen o in ririan san yamel madid san ak iragali ibal go imasag, Jesus san na ipalu ya.

⁵¹ Jesus isumiani, “Onj ata mel naj onj o njigane wo ilo ibol di?”

Agog mala itau tamol an ru naon irupej, “Tubun en, naj aban njile wo namat da.”

⁵² Agog Jesus irupeig ibol, “Wau. Onjane ilo rumok iginiog uya isusa ya.” Gamu nam malan uyan ilasag aban ile kisaek onj a. Agog dal im Jesus njen aban irig yau a.

11

*Jesus Kij onj Jerusalem na iladu ya
Mat 21:1-11; Luk 19:28-40; Jon 12:12-19*

¹ Jesus inſan megeloum dida Jerusalem sumeik dupanig, Did Oliv siniren na panu uraru ta yanjad Betfage in Betani da dubol dan ate disusa ya. Ago man Jesus inanen megeloum uraru ta idinaig ² irupidaig ibol, “An urarum panu o malad yang tile dan ate au. Aup aladu dop donki foun ak ta dususeg imado dak ale wa. Donki an fufo talpein ta imasi man tia ya. Kam apasip ananep nſaisag na apalu wa. ³ Tamol ta irupaian, ‘An ata wo ago agane dak i?’ ago ibol tap, an igo arupei wa, ‘Donki en Tubun ak ibunawi san urat aman da ya. Milaen tiap in ririan fon iganep imul ipalu wa.’ ”

⁴ Aria, megeloum uraru an diaug, donki foun ak ab san dalawan ate dususeg kuai te dal na itur dugo dile ya. Agog kam dusopasi a. ⁵ Ago dugo tamol aenta sumeik dutur an igo dusumianai, “Ata wo an donki an kam apasi di?” ⁶ Agog uraru an ru Jesus ibol ago mi durupidai a. Ago tag tamol an dilfu dugo donki dinaneg dida diau a. ⁷ Diaug, Jesus san na dilasag, inſad yamel milaen ak diragalig, donki patun fufo duruwari a. An itout go Jesus fufo imasig dida diau a. ⁸ Agog tamolpein wei kasik inſigned yamel milae milae yak diragali dugo dal te na duruwari se ya. Ago dugo aenkadi garan lo ai raen dututeg dal te na bala didiri se ya. ⁹ Tamolpein aenkadi, Jesus dida imug mi diau dugo, tamolpein aenta murna dupalu se ya, in fidian mi igo dubol duwagin se na ya,
“Hosana!

Tamol e Tubun ak yanjan lo ipalu den, Anut san bar inane ya!

¹⁰ Man tubuma bagema Dawid san kagin panek gamu ipalu dan, bar inane wa!

Aben lak na geig an lo per dupano wa!”

¹¹ Agog Jesus Jerusalem na iladug yaug, tempel san sep lo iladu ya. Agog aban ile itilanig mel ante dien dan fidian yil se ya. Gurai idu la yan ninen o tempel lubanek ibiseig kuai te ilasag megeloum adi dida dumul go Betani na diau a.

Jesus ai gurab imisilani a

Mat 21:18-19

¹² Dien go tidom lom saen Betani dibisei man, Jesus imatigen. ¹³ Agog malan yaug, asau mi ai gurab ta ile ya. Gurab an roun mutunol tinan. Ago tag yaug sumeik go nujon aban an ile, ak man nujon an tia, roun kawan mi a. Man dugo, nujon ifu san nal gamugo da. ¹⁴ Ago tag Jesus ai an ipeig ibol, “Talpein ta on nujo fon ta yani na wa.” Jesus ago ibol dugo megeloum adi awan dulon a.

Jesus tamol tempel san ar ilon lo didaen digane se yan ikudai a

Mat 21:12-17; Luk 19:45-48; Jon 2:13-22

¹⁵ Jesus imul Jerusalem na yaug, tempel san sep ilon lo iladug, aben ante dadej tamol adi, agod a melmel moni nam didad se yan dam fidian ikudaig kuai te dilasa ya. Insad tebol fufo moni dubulsa se yan, iratitalaig yabibol idu dugo, tamol aenta muluk didad se yan sad kalik dam iratitale idu ya. ¹⁶ Agog tamolpein tempel san tom ilon lo melmel disini diau wo man ninen o ipadau a. ¹⁷ Agog ipitejanaig kududod yabig igo ibol, “Ru e Anut san buk lo digire man, ‘Naisag ab en gudanek san ago dubol a, ante man tan fidian san tamolpein ka dugu-dani wa.’”

Ak man an agane ilasag ‘gumagam adi sad mianuk ab’ igo yen da.”

¹⁸ Pris gurman adi agod kubiaen san girek manau adi ru an dulon a. Ago tag dal ta ate Jesus daon dupani san ninen o aban diabi se ya. In itaot dufuni imat san tia ya, man dugo, in ninen o direr. In dulon ak tamolpein malan tubun in san pitejanek dulon dugo an ninen o fidian durut saian a.

¹⁹ Aria, saen ad idu yau man Jesus in anen megeloum adi dida Jerusalem dibiseig diau a.

Ai gurab a Jesus imisilani an ibun a

Mat 21:20-22

²⁰ Dien go tidom lom mi fon turen diabi dugo ai gurab a nor Jesus ipei funi an dile ya. Ai an dabin ateg yaug ulun na man ibun idu ya. ²¹ Pita ru a Jesus nor ibol an ilon isoug irupei, “Tubun en, ule. Ai gurab on misilani an ibun idu ya!”

²² Jesus ru naon irupidaig igo ibol, “An Anut lo ilo rumok amam da amado wa. ²³ Nai rumok nurupaian da, talpein ta in ka did en igo irupei, ‘On masap, se ibulo beig lo waup udu.’ Ago dop ilon ta uraru na dop, ru a ibol an nunon ilasa wak ago ilon lo rumok nunon tap, ibol ago mi in san na ka ago ilasa wa. ²⁴ Amaiak ninen o nai nurupaian da, on gudanek lo mel ta wo Anut sumiani dop, in mel an ipano la yak igo won ago ilo lo rumok a. Ago gane tap, mel an on da wa. ²⁵⁻²⁶ Agod saen on utur on Anut gudani dan man, talpein ta ida ru ama da tap, malmalan ilo lo saian an sasi pani wa. Agop onane Tama kumaen panu lo yan in dam onane saian an isasi pano wa.”

Inj Jesus dusumiani, Enti kob ipano ya?

Mat 21:23-27; Luk 20:1-8

²⁷ Agog fon Jerusalem na dilasag, Jesus tempel san tom ilon lo yaug itor dugo, pris gurman, kubi-aen san girek manau adi, agod tamol tutubu yak adi inſan na dupalu ya. ²⁸ Agog dusumiani, “On kob en dabai da dugon te njaneg lo mel en gane dak i? Enti mok dabai en ipanog ate urat en gane wo ibol ak i?”

²⁹ Jesus awad yabig igo ibol, “Njai dam mel ta ninen o an nſumianan o da. Ago dop an imug nſaisag sumianek an itaot arupaiaſag tap, enti mok inj urat e nſigane den san dabai ipanag an ka nſabol pe alon a. ³⁰ En dugo ilom isou di? Jon san suguek man, kagin an dugon te injane yak i? An kumaen panu san mel, tia, an tamol sad mi ak i? Abol nalon!”

³¹ Agog inſed nugnug lo igo dininjen se ya. “En man kumaen panu san mel, ago tabol tap, inj igo ibol isumianad a, ‘En ata wo an inj ninen o ilom ta rumok na i?’ ³² Ak gug ‘En man tamol sad mel mi a,’ ago tabol tap, id o dugo ilasa wak i?” (Tamol tutubu emaiak tamolpein kawan ak ninedi wo tarer na ya, ata wo, tamolpein kawan ak sad ilo sou lo man, Jon mi inj profet.)

³³ Man ninen o inj igo dubol durupe, “Man ta malon na ya.”

Ago tag Jesus ibol, “Ago yak ninen o nſai dam enti dabai en ipanag go ate urat e nſigane den ta nſurupaian na wa.”

12

Abi san kagin panek adi sad ru faſan

Mat 21:33-46; Luk 20:9-19

¹ Kubaiek an itout gug, Jesus ru fanan lo kubaieñ tamol adi naod na igo ibol ilasa, “Tamol ta inñ ai wain san abi yabig ar ifou ya. Abi an ilon lo wain patun dupartitale dop dupipi san gib yabi a. Agod inñ ab dam abi ilon lo yabi a. Agog inñ tamol ta abi an kagin dupani san ipilianaig, abi an banid lo idiri a. Aria, saen abi taman inñ urat an fidian igane itout man, imasag tan asau ak ate yau a. ² Saen ai wain nuñon ifu san nal idu man, inñ inñanen biabi nñalajal ta idinig inñanen wain nuñon aenta isini ipalu wo yau a. ³ Ak man urat tamol a abi lo dumado dan dumasag, tamol an diabig dufunig digane imul go banin kawan yau a. ⁴ Ago tag abi taman fon urat pinein sen ta idinig yau a. Ak man dumasag kabuñan ate dufunig tinin malan dusue saian a. ⁵ Aria, urat pinein sen ta idinig yau a. Agog dufuni imat a. Nek ago mi, inñ urat pinein aenkadi wei mi idinaig diau a. Gug abi kagin panek adi aenta dufu dugo aenkadi dufu dumat a.

⁶ “Ago igane yaug tamol an talpein kisaek o lian idinip yau san imado. Agod talpein an inñsiganen nanun mok niñen o tubun mi imat da. Wadan lo nanun en idinig yau a, man dugo, abi taman ilo sou igane man, ‘Inñ nñaineg nanuk awan kagin dupani wa.’

⁷ “Ak man tamol abi lo urat digane dan, inñsed nug lo igo dubol, ‘Tamol e ipalu yen man taman san melmel fidian mi inñane wo da. Ago yak niñen o id tufunip imat dop, inñsan abi id tiñane wa.’ ⁸ Ago dubol go dumasag diabig dufunig imat go tubabun dubal go ar patun fo ilasa ya.

⁹ “Aria, abi taman dugo igane wak i? Inñ abi lo

yaup abi kagin panek adi daon ipidinaip abi an banid na ipasip urat tamol senamo yak banid lo igane wa. ¹⁰ Nag an ru e girek lo yen den ta asuti na i?

‘Pat nek a ab bek tamol adi dumoi dan,
nek amaiak ab tinin fidian yabi sakar da.

¹¹ Anut sen ago igane ya,
agod id malad lo en man siñaokan geig a.’ ”

¹² Agog tamol tutubu yan an dal ta Jesus diabi san maeg diganeg aban dile se ya. Man dugo, in dulon ak Jesus inanen ru lo in isiai se ya. Ak man ta dusubani na ya, ata wo, tamolpein malan tubun dutumani an niñedi wo direr, ago yak niñen o Jesus dibiseig diau a.

Kaisa san takis niñanjal

Mat 22:15-22; Luk 20:20-26

¹³ Agog tamol tutubui adi in Farisi aenta agod Herod san tamol aenta dam didinaig, Jesus san na diau a. In Jesus dibitinae dop siganen ru lo diabi wo ilod yen ak atem diau a. ¹⁴ Aria, in Jesus san na dilasag durupe, “Girek manau, man malon ak on ru rumok san tamol. On tamol senamo yak on niñe wo ilod isou dan niñen o ta urer na da. Man dugo, gidad yanad amad da yak, tia yak dam, niñedi wo on ilo ta weiwei na da. Fun an lo on tamolpein Anut san dal an niñen o ru rumok nam itaot mi pitejanai da. Id Kaisa takis moni tupani wan uyan ak i? Tia, saian ak i? Idsad kubiaen mel en niñen o dugo ibol dan ubol malon. ¹⁵ Id ka tadad ak i? Tia, tia yak i? Itaot rupaiama.”

Ak man Jesus tamol adi an balek rararu san kagin lo dubol an ilon uyanan a. An niñen o in

isumianaig ibol, “Anj ata wo bitinaek lo aginiag dak i? Anj moni ta asini apalup njile.” ¹⁶ Agog moni ta disinig san na dupalug dupani a. Agog isumianai, “Mitilaen e fufō yanjak digire yen enti san ak i?”

Agog awan diabig dubol, “Kaisa san.”

¹⁷ Ago tag Jesus ibol irupidai, “An ninjen o anj mel ta Kaisa san tap, Kaisa apani wa, agod mel ta Anut san tap, Anut apani wa.”

Ru an dulon go durut saian geig a.

*Sadyusi adi Jesus diabi wo bitinaek lo digane ya
Mat 22:23-33; Luk 20:27-40*

¹⁸ Agog Sadyusi adi maten lo kumaen masa san tia ago ilod isou dan sumiaen kisaek da Jesus san na dupalu ya. ¹⁹ “Girek manau, Moses gubak mi id o igo igire ya. Tamol ta in nanuk aman tia yak imat go pein ak ibiseig imado tap, gidad tein imasap iwon ka inanep an lo tein imat la yan wagen lo nanuk idirai dilasa wa. ²⁰ Aria, gubak mi man tein muroun nunod 7 man lulunama lo dumado ya. Matu ak pein inaneg imado nag imat, ak gug in nanuk aman tia ya. ²¹ Ago yak ninjen o tein imasag matu imat an san pein inane ya. Tein bakan ak dam nanuk aman tia agog imat a, tein fon taidam in dam nek ago mi, ²² nek ago mi yang nunod 7 ante itout a. Tamol an fidian nanuk amad tia ya. Wadan lo man pein an dam imat a. ²³ Saen tamolpein dumat la yan fon kumaen dumasa tap, tamol an ilod lo pein an enti mok iwon ak i? On ulon ak in fidian iwodi a.”

²⁴ Agog Jesus awad yabig ibol, “Anj afurfi saian geig a. Man ata wo? Anut san ru girek lo yen agod

Anut san dabai dam an ta alon uyan na ya. ²⁵ Saen tamol dumat pe dumasap kumaen panu na diau dop, pein ta dusu na wa, agod ante tamol man pein njed ta dupani na da. Tia, in kumaen panu san enel igo won dumado wa. ²⁶ Agod taida mi, tamol dumat ak fon kumaen dumasa wan ninen o an kududom agure. Nag an ru a Anut irupaian an ta asuti na yak i? In igo ibol, 'Nai man Abraham san Anut, nai dam Aisak san Anut, agod nai dam Jakob san Anut.' ²⁷ Anut man in tamol dumat ak sad Anut tia ya. Tia, in man tamol kumaed dumado dak sadi a. Rumok nunon, an afurfi saian geig a!"

Kubiaen dugomaiak malan te yak i?

Mat 22:34-40; Luk 10:25-28

²⁸ Kubiaen san girek manau ta ipalug Jesus Sadyusi dida ru lo nug diabi yau imul dugo ilon a. Ru naon sinjakan Jesus irupidai an ilon tag, in dam Jesus isumianig ibol, "Kubiaen dugomaiak malan te yak i?"

²⁹ Jesus awan yabig igo ibol, "Kubiaen malan te yak nek en: 'O Isrel adi, kududom agure wa. Idsad Anut man Tubun en kisaek o lian a. ³⁰ Tubun en onjane Anut ninen o umat a, onjane bube fidian lo, onjane ntu fidian lo, onjane ilo sou fidian lo, agod onjane dabai fidian lo ago gane wa.' ³¹ Kubiaen turan man igo ya. 'On nek ibol onse niye wo umat dak ago mi tamolpein aenta dam nijedi wo umat a.' Kubiaen ta in kubiaen uraru en irinjanai man tia ya."

³² Agog kubiaen tamol an igo ibol, "Girek manau, on ubol uyanan ak, Anut in kisaek o lian, agod in sen kisaek mi imado da, tubud taida man tia

ya, ru an rumok nuṇon. ³³ Agod talpein ta in buben fidian lo, inanen ilo sou fidian lo, inanen dabai fidian lo yak Anut ninen o imat, agod inanen tamolpein aenta nek ibol inſen ninen o imat dak oṇ, ago mi niṇedi wo imat a. Kagin naok ago yak, yai niganag mudan Anut ipani san fidian mi iriṇanai geig a.”

³⁴ Saen Jesus tamol an ru naon maṇau anda ipani an ile ilonṇ man, inṇ tamol an irupei, “Oṇ Anut san kagin panek ate asau mi ta mado na da.” Ru an itout go Jesus san ager adi sumiaek taida dusumiani wo fidian direr a.

Kristus inṇ enti nanun ak i?

Mat 22:41-46; Luk 20:41-44

³⁵ Jesus tempel san tumanek aben ilon lo tamolpein ipitenṇanai dugo sumianek ta ipidinai a. “En dugo wonṇ go kubiaenṇ san girek maṇau adi, Kristus inṇ Dawid nanun an dubol na yak i?”

³⁶ Dawid inſen mi, Awan Urgan iduduwi dugo igo ibol:

“Tubun en ṇaisag Tubun ak igo irupei,

“Oṇ ṇai tuog won ak ate masip mado,

murna gup ṇai oṇsa ager adi ṇidiraiṇ,

oṇ ṇie pae na dumado dop ṇie nam partuanai a.”

³⁷ Amaiak ninen o Dawid inſen mi tamol an Tubun ak ibol tap, en dugo wonṇ pe inṇ Dawid nanun ak i?”

Tamolpein malan tubun ante dumado dan inſan ru dulonṇ dugo ilod bulbal se ya.

Kubiaenṇ san girek maṇau inṇ kagin saiak digane na ya

Mat 23:1-36; Luk 20:45-47

³⁸ Jesus pitejanek ipidinai dugo irupidai, “Kubi-aen san girek manau adi niñedi wo kagin agane wa. Inj kulos milae milae sinjaokan ak didirip diaup didaen aben lo dutor dop aenkadi ilo uyan ru dupidinai o ago ilod yen da. ³⁹ Agod ubou ab lo kalik malan te tamol tutubu ate dumasi dan inj ate dumado da. Agod soubul lo dam nek ago mi digane dop, tamolpein inj kagin dupidinai o ago digane da. Inj se pitianoï kagin naok naok igo yan niñen o tubun mi dumat da. ⁴⁰ Inj pein suos sad ab digam da. Agod gudanek milae milae kasik digane da, ak man an sen kawan digane da, man dugo, tamolpein dil o ilod yen da. Tamol naok ago man Anut san bitinaek nal lo naon saian geig a diñane wan tamolpein aenta sad naon iriñani geig a.”

Pein suos san lou panek tusan

Luk 21:1-4

⁴¹ Aria, tempel san tom ilon lo aben titin ta yen dugo ate moni san kunup yen a. Ate Jesus kunup an kitek siñiren na imasig imado dugo tamolpein wei mi dupalu dop moni kunup lo dubal dugo yil se ya. A filiad amad da yan wei mi moni tubun mi dubal se ya. ⁴² Agog pein suos filian aman tia yan inj dam ipalug pat bras uraru o lian an kunup lo ibal a. Naon man tusan a.

⁴³ Jesus inanen megeloum igiaig san na dupalug irupidaig ibol, “Nai rumok ñurupaian da. Moni e pein suos filian aman tia kunup lo ibal en, tamolpein fidian sad moni dubal an iriñani geig a. ⁴⁴ Man dugo, aenkadi inaned filiad tubun ak lo moni samun diñaneg dubal a. Ak gug pein filian aman tia yan mel fidian lo katuk aman bo man,

moni sapita in da yan fidian mi ibal a. An lo sen aben ipitig itout a.”

13

Jesus tempel daon dupani wak ninjen o ibol a

Mat 24:1-2; Luk 21:5-6

¹ Saen Jesus tempel ibisei wo dugo megeloum ta igo ibol, “Girek manau, ule, tempel san pat tintinan nujon a, in san naon man sinjakaan geig a!”

² Ak man in ru naon igo irupidai, “An ab tintinan en eil ak i? Nai ru rumok jurupaian da, ente man pat ta kisaek sen ta tinin fufo ta yen na wa. Tia, fidian mi tamol adi dugufututep diabibol tan na dudu wa.”

Nal wadan ilasa san kob funfun

Mat 10:17-22; 24:3-14; Luk 21:7-19

³ Jesus Did Oliv fo imasig imado se ya. Did a ate imado yan did tempel fufo itur dan san turan, titinaem tan ikilokan ak yen da. Agog Pita, Jems, Jon di Andru da ago mianuk lo san na dupalug dusumianig igo dubol. ⁴ “On rupaiama, saen dugomaiak lo melmel en dilasa wak i? Kob dugomaiak imug mi ilasa dop ate man malon ak, melmel en fidian dilasa wak i?”

⁵ Agog Jesus awa biek ru igo irupidai a. “An kagin agane wa, kabelan tamol ta an irawan banau.

⁶ Tamol wei mi dupalup nai yanag dupatep dubol a, ‘Nai nek emaiak Kristus.’ Ago dop tamolpein wei kasik dirawai a. ⁷ An yu ager alon ak, agod san ru tim dam alon a. Ago dop kagin agane wa, kabelan amasa saian banau, man dugo, mel en man ka ilasa wak, gug nal wadan san saen man

gamugo da. ⁸Tamol malan ta lo yu diabisap, tamol malan ta lo yu ager digane wa. Ago dop kin ta inſan tamolpein dida yu diabisap, kin sen ta inanen tamolpein dida nug dufuni wa. Agod aben sensen lo man kadag* tubun mi idu dop kanaurig tubun ak gidigheid dilasa wa. Nek ibol pein nanuk igansi wo dop madai ile dak igo won, melmel en fidian man, madai a nal wadan ilasa san amaiak ilasa wo fun igane da.”

⁹ “An gidad tawan aganep amado wa. In an dibian pe anſiganem panu lo ager adi banid lo didiran pe kot lo atur a. Juda adi sad ubou ab gidigheid dien dan lo an tinimi dugufutute wa. An nai naog ananep kin adi agod gabman gurman adi naod na atur a, an nai nineg o abol dop dulong a. ¹⁰ Agod naineg bilalun uyanan en imug tamolpein warou adi tan tilianek fidian lo dubol ilasa dop dulong a. ¹¹ Saen in an dibian pe kot lo dida au dop, ru dugomaiak abol ak ninen o ilom ta weiwei na wa. Tia, nek ru dugo Anut saen an lo ipano an mi arupidai a, man dugo, ansem ta abol na da, tia, Awan Urgun in awam lo ibol ilasa da.

¹² “Tein ta in tein san ager adi banid lo iganep dufuni imat a. Taman ta dam nanun muroun sad ager banid lo idiraip daon dupidinai a. Nanuk dumasap tinad tamad lo siai diganep ager banid lo didiraip dufu dumat a. ¹³ Tan en san tamolpein fidian an lo siai digane wa, en ata wo, nai yanag man anſam na yen la ya. Ak man, talpein inanen ilo rumok yabi sakar yaup, saen inanen kumaen tan en lo itout ak ate dop, Anut talpein an patun ipasi wa.

* **13:8:** Futol

*Murnap mel ta saian geig ak ilasa wa
Mat 24:15-28; Luk 21:20-24*

¹⁴ “Saen ilasa dop, mel ta tempel san aben gun ak lo dugunip, mel an ate itur san tia yak ate itur dop ale wa. Mel an gubak mi profet Daniel ninjen o ibol a. Mel an Anut malan lo man iganan geig a, nek mel amaiak igane dop daonj panek ilasa wa. (Onj ru e suti den ulonj uyan o ta pasauman na yak man, maeg gane tap ka ulonj ak boi.) Nal an lo dop, tamolpein a Judea na dumado dan, dusol diaup did luluñad lo sed imianai a. ¹⁵ Talpein ab fufo na imado dan, imul idup ab lo injanen biounj isini wo ta iladu na wa, tia, itaot mi isol yau a. ¹⁶ Agod talpein abi lo imado dak dam, gidad imug mi yamel madid san ak injane wo ta imul yau na wa. ¹⁷ O kabel, nal en san pein adi anj luam am da, agod anj pein anjam nanuk su apidinai dan dam, ñai ilog tubun mi imunananj da! Nal en man saian geig a. ¹⁸ Anj gidad agudani dop, mel en madid san saen lo ta ilasa na wa. ¹⁹ Man ata wo? Saen an lo dop muruan tubun geig ak ilasa wa. Muruan naok ago yak gubak mi ta ilasa na ya, saen tan en ilasag ipalug gamu en lo, mel igo yak ilasa man tia geig a, agod murnap fon ta ilasa da na wa. ²⁰ Anut saen en itutep katukan a, inj ago ta igane na tap man, tamolpein fidian mi dideg diau a. Ak man, saen an lo dop Anut tamolpein a ipilianai la yan ninjedi wo ilon isou wa. Amaiak ninjen o inj saen an itutep katukan a. ²¹ Nal en lo talpein ta anj irupaianj pe ibol, ‘Ale, Kristus ente imado da!’ tia, ‘Inj onte imado da!’ ago ibol dop, anj ilom ta rumok na wa. ²² Man dugo, kristus sewak ak inj profet sewak adi dida dilasa wa, ago dop inj kulob girager ak,

agod mel naon senamo geig ak tamolpein malad lo dukubiaip dile wa. An lo dop idaisuda tap, in tamolpein a Anut ipilianai la yan dirawaip lo diau dudu wo ago maeg digane wa. ²³ Amaiak ninen o an tawan aganep amado wa. Mel en gamugo ilasa dugo naj imug mi mel emaiak ninen o kuai tem njurupaian la ya.”

Murnap Tamol Nanun tan na imul ipalu wa

Mat 24:29-31; Luk 21:25-28

²⁴ “Saen en san muruan tubun ak itout la gup, ‘ad ta ided uyan na wa, an lo dop adian tidom on ilasa dop

kalam ta ided na wa.

²⁵ Ante dop patui keit dibiseip dudu wa, agod Anut in mel dababai keit lo yak imiranai a.’ ”

²⁶ “Saen an lo dop, tamolpein in Tamol Nanun keit san timtaen fufo na itur dop dabai agod girager tubun geig aman da yak lo ipalu dak dile wa.

²⁷ Ago dop Tamol Nanun inanen enel adi idiraip dufufurak diau a. Ante dop inanen tamolpein kob ipidinai an dutumanai a. In tim sukurun iwoiwo an lo nap dijal dupalu wa, ago mi yaup tan gigin itout ak ate wa.”

Ai gurab san ru fanan

Mat 24:32-35; Luk 21:29-33

²⁸ “An ai gurab lo ilo sou agane wa, in manau ka ipanan a. Saen insan raen you aman da, agod roun foun ilasa dop, an alon ak madid itout go ad ilasa san saen sumeik ipani da. ²⁹ Amaiak ninen o, an murnap melmel fidian e dilasa den, ale dop, an alon ak Tamol Nanun in ipalug sumeik, dalawan

ante itur da. ³⁰ Nai rumok ηrupaian da. Warou gamu en san tamolpein gamugo itout yau dop melmel en fidian dilasa wa. ³¹ Keit in tan da in murnap itout a, ak gug ηaisag ru man ta itout na wa.”

Nal mok mel en ilasa wan id fidian niηen o tiηaon a

Mat 24:36-44

³² “Ak gug talpein ta melmel an niηedi wo nal dugo di auwa dugo dam dilasa san o ta ilon na ya. Kumaen panu san enel adi ta dulon na yak, agod Nanun sen dam ta ilon na ya. Bai in sen mi ilon a. ³³ Amaiak niηen o an tawan agane wa. An malam ipuk on amado wa. An ta alon na yak nal dugo lo ananem Tubun ak ipalu wa. ³⁴ En man igo ya. Tamol ta in tan asau ak ate yau o dugo in anen urat biabi urat pinein banid lo iganep, anen anen in siganed urat ipidinai a. Ago dop dalawan titianek tamol irupe, ‘On ηai ηamul ηupalu san niηen o tawan ganep mado wa.’

³⁵ “Amaiak niηen o an tawan aganep amado wa, man dugo, nal mok lo ab taman imul ipalu wak an ta alon na ya. Gurai lo boi, tidom tubun lo boi, kurek ibob san saen lo boi, tidom lom mi boi, an an aon da. ³⁶ In ririan imul ipalu dop, an kabelan ni on abip amado dop ilian banau. ³⁷ Ru e ηai ηrupaian den, ru kisaek mi tamolpein fidian ηurupidai da: ‘Tawan aganep amado!’ ”

14

Gurman adi Jesus dufuni imat o awad dutumani a

Mat 26:1-5; Luk 22:1-2; Jon 11:45-53

¹ Tumanek tubun ak yañan Pasova dubol dan san saen idu san, nal uraru o lian yen da. An itout gup, tumanek aenta yañan Bret Yis Aman Tia ak San Soubul dubol dan ilasa wa. Pris gurman adi agod kubiaen san girek mañau adi in dal ta pasak nam ate Jesus diabip dufuni imat san ninen o aban diabi se ya. ² Agog dubol, “Soubul nal tutubu e ilasa den lo ta tigane na wa, kabelan tamolpein dile dop dumasap ager diganep aben daon dupani banau.”

Pein ta Betani na guren Jesus kabunan fufo ikulmaek a

Mat 26:6-13; Jon 12:1-8

³ Jesus in Betani panu na imado dugo, tamol ta yañan Saimon tinin lepra aman da yak san ab lo ida dumado se ya. In tebol giranen na imasig imado dugo inuai se ya. Ago dugo pein ta in guren, pat butol alabasta nam digane yan siñaokan ak, isinig san na ipalu ya. Butol an ilon lo guren naon lak na geig ak, yañan nard dubol dan, awan isa. Aria, Jesus anan yani dugo pein an ilasag, butol buron ibalsinig guren an kabunan fufo na iwali idu ya.

⁴ Saen aenta ate dumado yan mel ago dile man, tinjaed saian go nug lo dubol ila iso se, “En ata wo on guren kawan bidani dak i? ⁵ Gidad tubuseip, tamol didad pe moni tubun mi lo tinjane wa. Tamol ta ananar kisaek urat igane dak san naon, moni nek ago yak ka tinjane wa. Ago dop tamol filiad tia yak ka tupidinai a.” Agog ru dabai nam pein an dupei a.

⁶ Ak man Jesus ibol irupidai, “An pein en abisei! En ata wo muruan apani dak i? Inj man naj niñeg o kulob sinjaokan geig ak igane ya. ⁷ Saen fidian tamolpein filiad tia yak dida amado da, agod an ka anjanem ilobol lo abinawai a, ak gug naj man saen milaen an da ta tumado na wa. ⁸ Inj mel kabelan igane wo idaisuda yan ago igane ya. Inj naj tinig fufo gurenj iwali an lo man, inj naisag sisanug mutou lo digane wak san dal ikubune ya. ⁹ Naj ru rumok nurupaian da. Tan dugon te bilalun uyanan en dubol ilasa wan, ante dam kulob e pein emaiak igane yen ninen o dubol ilasap, lo pein en ninen o ilo sou digane wa.”

Judas Jesus ager adi banid lo igane san promis ipidinai a

Mat 26:14-16; Luk 22:3-6

¹⁰ Agog Jesus san megeloum 12 an ilon lo tamol kisaek, yanjan Judas Iskeriot, imasag pris gurman adi sad na yaug, Jesus ager adi banid lo igane wo ilon ago ibol dan irupidai a. ¹¹ Ru an dulon go ilod uyanan a, ago tag inj moni dupani wo ru dufuni a. Amaiak ninen o nal an log ipalu, dal uyan ak ta ilep ate Jesus banid lo igane san ninen o aban yabi se ya.

Jesus saen wadan megeloum dida anan diani a

Mat 26:17-25; Luk 22:7-14,21-23; Jon 13:21-30

¹² Bret yis aman tia yak san soubul gun, inñsan nal malmalan lo, megeloum adi Jesus san na dupalu ya. Nal an san saen lo man Isrel adi Pasova san sipsip nanun dufu dumat san a. Megeloum Jesus san na dilasag dusumianig dubol, “Onsa ilo lo,

dugon te maup melmel mukubinep onj ate Pasova san anañ wani wo ubol dak i?"

¹³ An lo Jesus megeloum nuṇod uraru itarpasaig igo irupidai, "Añ aup taun tubun ak lo aladu wa. Ante man tamol ta you kapen anda isini ipalu dop ilian a. Ago dop ṇien aban ari wa. ¹⁴ Ab dugon te iladu wan, añ dam ilon lo asudap, ab taman igo abol arupeï, 'Girek Mañau igo isumiaen a, galuṇ dugomaiak lo, ate ṇaineg megeloum dida Pasova anañ mani wak i?' ¹⁵ Agop galuṇ tubun a ab fufo yen dan, agod ilon lo mel fidian dukubune lag idaisuda yen dan ikubiai panañ a. Ante idsad anañ akubune wa."

¹⁶ Megeloum uraru an dal diabig taun tubun ak lo diau a. Ante mel fidian Jesus ibol ago mi dile ya, agog Pasova san anañ dukubune ya.

¹⁷ Gurai idu dugo Jesus inanen megeloum 12 dida dupalu ya. ¹⁸ Saen in sisem tebol giranen na dumasig anañ diani dugo, Jesus igo ibol, "Nai rumok ṇurupaian da, tamol ta ete ṇai da anañ tani tumado den, in ṇai ager adi banid lo iginiag ṇau a."

¹⁹ Ru an duloṇ go ilod muruan idu ya. Agog inṣed kisaek kisaek Jesus dusumianig dubol se, "Dugo ṇai tia i?" Ago ago dubol yau se ya.

²⁰ Jesus ru naon ibol, "Tamol en man megeloum 12 luluṇam lo imado da. Tamol nek a bret inanep daeg san tuor lo ṇai da sisem banima idu dan, nek amaiak ṇai ibilag pe ager banid lo ṇau a. ²¹ Tamol Nanun in nek ibol ru buk lo in ninen o digire an, nek ago mi yau da. Ak gug tamol enti a Tamol Nanun iganep inanen ager adi sad tuod lo yau an, rumok in muruan tubun kasik ak ile wa! An lo

gidad tamol an san tinan ta igansi na tap, an in o uyanan mok a.”

Jesus in bret agod wain da in aneg megeloum ipidinai a

Mat 26:26-30; Luk 22:14-20; 1Kor 11:23-25

²² Aria, in anan diani dugo Jesus bret in aneg, Anut ilo uyan ru ipanig yafuteg, in anen megeloum ipidinai dugo ibol, “An anane, en man niasag tinig.”

²³ Agog wain gab in aneg, Anut ilo uyan ipanig, iwae pidinaig, in fidian lo duluk a. ²⁴ Agog in irupidaig ibol, “En man kontrak san dar, tamolpein wei mi sad aupasek isuas o nuwali idu wa. ²⁵ Nai rumok nurupaian da, nai fon ai wain san nunon lo ta naluk na wa, ago yaup nal amaiak ante nai fon an da Anut san kagin panek aben lo taluk la gup ilasa wa.”

²⁶ Agog in Isrel san bar ta diabig itout go galun an dibiseig Did Oliv fo na disuda diau a.

Jesus Pita in ninen o itot ak ago ibol a

Mat 26:31-35; Luk 22:31-34; Jon 13:36-38

²⁷ Diau dugo Jesus in anen megeloum adi ru igo irupidai, “Gamu tidom nek en lo, an fidian mi nai ninen o ilom idu yaup abisawag a. Man dugo, Anut san girek lo ru igo ibol,

‘Nai titianek tamol nufuni wa,

agop in san sipsip adi dusol gidigheid diau a.’

²⁸ Ak man Anut nai ibiagsap fon numasa la gup, nai an naom na imug mi Galili na nau a.”

²⁹ Pita irupeig ibol, “Tamol fidian in bo on ninen wo ilod idup dubusawo wak gug, nai man tia wa!”

³⁰ Jesus awan yabig ibol, “Nai rumok n̄rupaio da, gamu tidom nek en lo kurek saen uraru gamugo ibob dop, nal utol on̄ nai utot a.”

³¹ Ak man Pita ru dabai ak nam irupeï, “Gidad, nai on̄ da tamat bo man, nai on̄ niñe wo ta n̄atot na wa, tia geig a!” Ago dugo megeloum fidian mi nek ago mi dubol se ya.

Jesus Getsemani na igudani a

Mat 26:36-46; Luk 22:39-46

³² Ago man Jesus in̄ dida, aben ta yañan Getsemani dubol dan ate diau a. Ante in̄ megeloum adi irupidai, “An̄ ente amasip amado dop, nai titin onte n̄aup gudanek n̄igane wo da.” ³³ Agog in̄ Pita, Jems agod Jon dida in̄jal go diau a. Saen an lo in̄ fun iganeg ilon ipapao* dugo ilon dam muruan idu se ya. ³⁴ An lo igo irupidai, “Nai ilog tubun mi muruan dugo n̄amat o sumeik da. An̄ gidad ete nai da malad ipuk pe tumado wa.”

³⁵ Ago dugo in̄ ipar kitek ilag, sen ibilig tan fo idug yen dugo Anut igudani man, isop Anut ilon tap, nal en san muruan ka ipasi pani wa. ³⁶ In̄ igo ibol, “Bai, nai Tamag, on̄ mel fidian ka gane wo idaisuda ya. On̄ gab en nai banig lo ka pasi wa. Ak gug on̄ n̄aisag ilog ta uri na wa, tia, on̄ man on̄sina ilo mi uri wa.”

³⁷ Agog in̄ in̄anen megeloum adi sad na ipalug, malan yaug dien dugo yil a. An lo in̄ Pita irupeig isumiani, “Saimon, en dugo, on̄ n̄ion wabi di? On̄ auwa kisaek nai da malad ipuk pe tumado san ta idaisuda na yak i? ³⁸ On̄ mala ipuk dop mosiai a, man dugo, kabelan mel ta ikubiano san ipalup ilio

* **14:33:** Ilon itau

banau. Rumok, ilo ibol dak gug tini dabai ama tia ya.”

³⁹ Inj saen uraru imul yaug ago mi imosiai a.

⁴⁰ Saen imul ipalu man njon diabi dugo yil da ya, man dugo, malad muruan geig a. Inj ata ru durupei san ta dulon na ya.

⁴¹ Saen utol imosiai itout gug, megeloum adi fon sad na ipalug igo irupidai, “An njon abi dugo yaes abal yau dak i? An nek a! Ale, njasag saen idu wo da, Tamol Nanun aupasek tamol adi tuod lo digane san saen idu la ya. ⁴² Amasap, tau o da. Ale, tamol enti a njai ager tuod lo isodudunag san man sumeik ipanad la ya!”

Ager tamol adi Jesus diabi a

Mat 26:47-56; Luk 22:47-53; Jon 18:3-12

⁴³ Jesus injinen go imado dugo Judas ipalu ya. Inj megeloum nunod 12 ak lulunad lo mi aben aman da ya. Inj ipalu dugo ida tumanek malan tubun ak inj sabiri agod tok dam duburoug naon na dilasa ya. Pris tutubu yak, kubiaen san girek manau adi, agod Isrel adi sad tamol gurman didinaig dupalu ya. ⁴⁴ Imug mi palan niganag tamol a inj tuod lo igane san man, kob ta dam ninen o igo irupidai, “Tamol a njai musuk nupani dop ale wan, nek an Jesus, an tamol amaiak abip yu tamol adi dulubanip dijanep dida diau a.” ⁴⁵ Aria, inj Jesus san na ipalu kisaek on go ibol, “O girek manau” Ago ibol go musuk ipani a. ⁴⁶ Agog inj Jesus duparsikawig diabig dusbani a. ⁴⁷ An lo man tamol ta inj Jesus sinjiren na itur an, sinan sabiri igursi go pris gurman san urat pinein ifunig, kududon ituteg idu ya.

⁴⁸ Jesus inanen ager adi irupidaig ibol, “En ata wo an sabiri in ai tok da asinig aliag pe abiag o apalu yak i? Ak dugo, nai man wagai adi gabman mabi idu san gurman igo won ago ilom isou di? Nal fidian nai tempel aben lo numasi dugo npitejanai se ya, ak gug an nai ta abiag na ya. ⁴⁹ Ak man melmel en fidian ilasa san fun man, ru gubak mi Anut san buk lo digire yan gamu en nunon ilasa wa.” ⁵⁰ Agog megeloum adi fidian mi Jesus dubuseig dusol go diau a.

⁵¹ Pinein ta, tinin yamel ta itabug on, Jesus njen aban iri se ya. Saen Jesus san ager adi pinein en dile man, diabi wo duparsikawi a. Insan yamel diabi a, gug in yamel iragalig, banid lo ikisaluk ilasag, ⁵² yamel banid lo ibiseig taen kawan isol go yau a.

Jesus pris gurman naon na ru lo itur a

Mat 26:57-68; Luk 22:54-55,63-71; Jon 18:13-14,19-24

⁵³ Tamol adi Jesus diabi an, dijaneg pris gurman san ab lo diau a. Ante man kubiaen san girek manau adi, pris tutubui adi agod Isrel san gurman adi dutumani lag malan digane se ya. ⁵⁴ Ak man Pita in Jesus njen aban irig diau ak gug, in kitek asau mi imado ya. In pris gurman san ar lo iladug ai katuk adi dida dumado ya. Tidom an madid ninen o yai lo tinid isue dugo dumado se ya.

⁵⁵ Pris tutubui adi, agod kaunsil fidian mi, tamol aenta digiaig sewak ru dubol dop, Jesus kagin saiak ta igane yak tap, ate dufunip imat san dal ta dile wo dukubiai na ya. ⁵⁶ Ak man tamol wei mi sewak ru amad da yan naod na dilasa bo man,

dal ta dile man tia ya, man dugo, ru ta naon kisaek dubol ilasa man tia ya.

⁵⁷ Agog tamol aenta dutur man Jesus tinin lo dusupaleg igo dubol, ⁵⁸ “Man ru igo ibol dugo malon a. ‘Nai tempel e tamol banid nam dususe yen n̄urubep, nal utol lo mi foun ak n̄abisa wa, an man tamol banid nam ta dususe na ya.’ ” ⁵⁹ Gug dal sensen lo dam ru an dubol se ya, ru naon kisaek tia ya.

⁶⁰ Ago dugo pris gurman in naod na itur dugo igo ibol Jesus isumiani, “On ru naon ta ubol san tia yak i? Ru e on n̄ije wo tamol emaiak dubol den dugo yak i?” ⁶¹ Ak man Jesus ru ta ibol man tia ya, itokubol itur se ya.

Agog pris gurman fon Jesus isumiani, “Dugo, on Kristus, Anut Nanun i?”

⁶² Ago man Jesus igo ibol irupei, “Awo, n̄ai mi Kristus. An murna gup Tamol Nanun in Dabai Tubun Geig ak san banin won ak ate imasi dop ale wa. Agod Tamol Nanun keit san timtaen fufo na imado dop ipalu wa, mel amaiak dam ale wa.”

⁶³ Agog pris gurman, ru an n̄ijen o imasa saian go in̄anen kulos irasireg igo ibol, “Gidad, tamol taidam, tamol en san kagin n̄ijen o dubol ilasa san id ta tigiiai na wa. ⁶⁴ Man dugo, gamu geig in̄anen ru lo Anut yan̄an irube idu yan an̄sem alon a. An̄sam ilo sou lo, dugo won̄ id tamol en n̄ijen o tigan̄e wak i?”

In̄ fidian dubol ak, tamol en mel saian geig ak igane, an n̄ijen o ka imat on̄ a. ⁶⁵ Ago man in̄ Jesus naon fo na dulusu se ya. Aenta Jesus yamel nam malan dufoug banid nam dufuni dugo naon dugufute on̄ dugo igo dubol se, “Profet ru ubol

ilasa!" Ago dugo yu tamol adi tinin dusue ditare se ya.

Pita Jesus niŋen o itot a

Mat 26:69-75; Luk 22:56-62; Jon 18:15-18,25-27

⁶⁶ Aria, Pita in ab patun fo ar ilon lo imado dugo, pris gurman san urat pein ta siŋiren na ipalu ya.

⁶⁷ Saen Pita yai giranen na tinin isue dugo ile man, malan ti ibol go irupe, "On dam Nasaret tamol amaiak ida amado na ya."

⁶⁸ Ago dugo Pita ru a pein ibol an niŋen o itot go igo ibol, "Ru on ubol dan nai ta nalon na ya, nai mel en niŋen o niŋaon geig a." Ago ibol go yang ar san dalawan te imado.

⁶⁹ Murna gug dalawan te imado dugo, urat pein an fon ileg niŋen o tamolpein sumeik dumado yan fidian irupidai, "Tamol en in luluŋad lo imado se ya." ⁷⁰ Pita fon itot a.

Saen kitekan go tamol adi sumeik dutur an Pita durupeig dubol, "Rumok geig, on in luluŋad lo mado da, man ata wo, on Galili tamol."

⁷¹ Agog Pita in Anut misilanek ru ka ipani wan niŋen o ru naok ago yan lo, fun iganeg sen imisi-lanig igo ibol, "Nai tamol en niŋen o abol den ta nalon na ya."

⁷² In ru ibol itout dugo, kurek saen uraru ibob kisaek on a. Ago dugo Pita in Jesus ru ibol an ilon isou a, "Kurek gamugo saen uraru ibob dop, saen utol nai ta ulon na yak ubol a." Ago man in ilon ipapaog tinaŋ tubun mi igane se ya.

15

Jesus dijaneg, Pailat san na diau a

Mat 27:1-2,11-14; Luk 23:1-5; Jon 18:28-38

¹ Salso idu dugo pris tutubui adi, Isrel tamolpein sad gurman adi, kubiaen san girek manau adi, agod inaned Sanhedrin kaunsil fidian mi mel dugomaiak digane wo awad kisaek a. Agog Jesus banin dusubanig, dijaneg, diaug Pailat banin lo digane ya.

² Pailat Jesus isumiani, “On Juda sad kin ak i?”
Jesus ru naon irupei, “Awo, onse nek ubol a.”

³ Agog pris gurman adi ru wei kasik Jesus tinin dusupaleg dubol se ya. ⁴ Amaiak ninen o Pailat irupeig isumiani, “Ulon, in ru sapita wei mi dupano da. Ak dugo, on ru naon ta ubol san tia yak i?”

⁵ Ak man Jesus ru naon ta Pailat irupei man tia ya, an ninen o Pailat ilo sou wei mi igane se ya.

Pailat Jesus aigim fo dibali wo ibol a

Mat 27:15-26; Luk 23:13-25; Jon 18:39-19:16

⁶ Aria, anajar fidian, tumanek gun an san saen lo mi, inaned tamol kagin igo ya. Gabman san tamol malan te yak, subanek tamol kisaek o lian amaiak tamolpein yañan dupate dop, ipasip kawan imado wa. ⁷ Saen an lo man tamol ta yañan Barabas in wagai tamol aenta dida subanek lo dumado ya. Wagai tamol emaiak Rom gabman malan dusue wo dumasag ager diganeg tamol aenta dufu dumat a. ⁸ Aria, tamolpein dutumanig dutur den Pailat san na duparsikawig dusumiani man, kagin a gubak mi iri na yan gamu en dam iri wa.

⁹ Agog Pailat doup tubun adi isumianaig ibol, “An ilom dugo ibol di? Juda sad kin njubuseip anşam na imul o?” ¹⁰ In ilon uyan ak man, tamol adi an in turak susai lo mi Jesus dijaneg kot lo dupalu ya. ¹¹ Ak gug pris tutubui adi tamolpein dududuwai dugo ilod diabisa dop, in Pailat duwagin pe Barabas ipasi wo dubol a.

¹² Agog Pailat ibol isumianai, “Ago yak ninen o anşam ilo sou lo, Jesus e an Kristus abol den ninen o naj dugo njigane wak i?”

¹³ Agog in disasai, “Aigim fo bali wa!”

¹⁴ Pailat isumianai da, “An ata mel o? In ata mel saian ak igane yak i?”

Ak man in awad tubun mi geig disasai, “Aigim fo bali wa!”

¹⁵ Man ninen o Pailat doup tubun an ilo uyan ipidinai o ilon ago ibol ak ninen o, in Barabas inşad na ipasi a. Agog ru iganeg Jesus diabig rasau nam dufuni a. Dufunig itout go inanen yu tamol adi banid lo aigim fo dibali wo igane ya.

*Yu tamol adi Jesus kukok aman digane ya
Mat 27:27-31; Jon 19:2-3*

¹⁶ Agog gabman malan te yan san yu tamol adi, Jesus dijaneg gabman san ab lo diau a. Ante man in Pailat san yu sawar fidian mi dupalu wo digiai a. Dupalug Jesus san na dutumanig dubuluwi a.

¹⁷ In yamel daran ak ta tinin fo na ditabug pani a. Ago dugo in kam dudurun aman da yak, kin san kitikat igo won ditiladeg, Jesus kabunan fo na disisi idu ya. ¹⁸ Agog in kukok aman digane dugo igo dubol, “Per o, Juda sad Kin!” ¹⁹ Agog tinin fo dulusu se ya, ago dugo makud dijaneg ate

kabuñan te dufuni idu se ya. Ago dugo naon na turud disoluwig, yañan diabisa dugo kukok aman digane se ya. ²⁰ Saen kukok aman digane itout man, yamel dupasig tinin fo inşiganen kulos digane pani a. Agog aigim fo dibali wo diñaneg diau a.

Jesus aigim fo dibali a

Mat 27:32-44; Luk 23:26-43; Jon 19:17-27

²¹ Jesus diñaneg turenj diabig diau dugo, yu tamol adi dal na taun Sairini san tamol, yañan Saimon, dile ya. Inj man Aleksanda inj Rufus da sad tamad, abañ lubanek ibiseig dal Jerusalem na yau ante Jesus irinani wo itor dugo, yu tamol adi dile ya. Inj disodudunig Jesus san aigim isini a. ²² Inj diaug aben ta lo dilasa, yañan Golgota. Yanak an fun igo ya, “Kabunjak tatu san aben.” ²³ Aben ante dilasag, marasin yañan mirr dubol dan wain da dukubulig Jesus iluk o dupani a, ak gug inj ta iluk na ya. ²⁴ Agog inj Jesus aigim fo dibali a. Inj dibali itout go inşed nug ilon lo inşan kulos dibititip anen anen kulos diñane wo ate satu dukok se ya.

²⁵ Ad mitilaen 9 kilok, saen an lo Jesus aigim fo dibali a. ²⁶ Ru ate kot dupani an, aigim fufo na dubali a. Ru en san sutek man, En Juda sad Kinj. ²⁷⁻²⁸ Agog Jesus giranjen na man, gumagam tamol wagai amad da yak nuñod uraru inj dam aigim fo dubalaig dusunjanai a. Inşad aigim man turan tuon won ak ate dugo, turan tuon ñas ak ate duguni a. ²⁹ Injanen ager adi diau dumul dugo nao futek ru wei mi tinin fo dubal dugo, kabunjad dukupari pani na ya. Inj dubol a, “Onj man tamol amaiak tempel ratitale idup, fon ad utol lo wabisa wo ubol

a! ³⁰ Aria, se patu ipaso wa, gamu en aigim biseip tan na udu wa!”

³¹ Nek ago mi pris tutubui adi, kubiaen san girek manau adi dam, sed luluᅇad lo kukok an digane se ya. In dubol se, “In tamol aenta patud ipasi na yak gug, sen patun ipasi san man tia ya! ³² En man Kristus, Isrel sad Kin. An ninen o in aigim ibiseip idu dop, an lo id tile dop ka ilod lo rumok a.” Dal kisaek mi lo tamol uraru a Jesus dida aigim fo dusanai an dam nao futek ru wei mi tinin fo dukulmaek se ya.

Jesus imat a

Mat 27:45-56; Luk 23:44-49; Jon 19:28-30

³³ Ad mitilaen 12 kilok an lo, tidom tubun tan yafutani geig go yaug 3 kilok gurai isi a. ³⁴ Saen kitek 3 kilok sumeik ipani dugo, Jesus awan tubun mi iwagin dugo ibol, “Eli, Eli, lama sabaktani?” Ru en fun igo ya, “Naisag Anut, naisag Anut, en ata wo najai bisawag ak i?”

³⁵ Tamol aenta sumeikan dutur dan, ru en dulon go ago dubol, “Alon, tamol en man Elaija iwagi da.”

³⁶ Ago dugo yu tamol ta in imaspalu yau silatik on go, mel ta beig san titalin igo won ak inaneg, wain gigen an lo isominig, dumadam ate ifoug, Jesus awan te isou isudag iluk o iwate ya. Agog in ibol, “Amoi dop id tile gup, nap Elaija ipalup aigim lo ipasip idu wo ipalu wak boi, nap tia boi.”

³⁷ Agog Jesus awan tubun mi iwagin go yaes ibal itout go imat a.

³⁸ Saen nek amaiak lo mi, yamel tubun ak tempel lo iyuk yen an, o lak na fun iganeg imasireg

yaug tan na idu ya, agog uraru dilasa ya. ³⁹ Saen yu tamol sad gurman Jesus naon na itur an, Jesus wagiñ dugo ilon, agod dal dugomaiak lo imat man, in ibol, “Rumok geig, en man Anut Nanun!”

⁴⁰ Pein adi aenta ate dumado se yan, asau mi dutur dugo leil digane ya. Lulunad lo pein kisaek ta man taun Magdala san Maria, agod ta man Maria, Jems a bakan ak dubol dan in Joses da tinadi, agod Salome. ⁴¹ Pein adi an saen Jesus Galili ilon lo turen yabi dugo dubunawi wo njen aban diri na ya. Pein aenta wei mi dam in Jesus dida Jerusalem na dupalu yan luad disa dugo leil digane se ya.

Jesus san tubabun pat gubaran lo digane ya

Mat 27:57-61; Luk 23:50-56; Jon 19:38-42

⁴² Nal amaiak man yan Kubunek Nal dubol da. (Nal tinin te ubou san nal.) Amaiak ninen o saen gurai idu dugo, ⁴³ Josef Arimatea san tamol, in man Juda sad Sanhedrin kaunsil lulunad lo tamol kisaek a, agod in dam Anut san kagin panek ilasa wo malan igane se ya. Insen ilon yabisag Pailat san na yaug Jesus san tubabun ipani wo isumiani a. ⁴⁴ Saen Pailat Jesus imat la yan ilon man, irut saian. Yu tamol sad gurman ipalu wo iwagi a. In ilasa dugo Pailat isumiani, “Dugo, Jesus imat la yak i? Tia, gamugo di?” ⁴⁵ Yu tamol gurman an Jesus imat la yan irupe i a. Ago yak ninen o Pailat Josef Jesus san tubabun ipani a. ⁴⁶ Josef yaug yamel ikokan foun geig ak idad a, agog yaug Jesus san sisanun aigim fo ipasig, yamel an ate ibuluwig, isinig yau a. Agog mutou foun ak lo igane ya. Mutou an man pat san gib, gubak mi

pat lo diabi a. Aria, Jesus san sisanun pat gib an ilon lo yen dugo, Josef pat muruan tinan ak ta ibili ipalug mutou awan ate ibalfutani a. ⁴⁷ Ago dugo Maria, Magdala pein, agod Maria ta Joses tinan, nuḡod urarum Jesus dugon te digansig yen den leil dupani a.

16

Jesus fon kumaen imasa da ya

Mat 28:1-8; Luk 24:1-12; Jon 20:1-10

¹⁻² Aria, ubou nal Sabat dubol dan itout go nal murna, ubou turan san nal malmalan ak, san salso sumeik idu se ya. Saen an lo taun Magdala san Maria, Maria ta in Jems tinan, agod Salome, in marasin uyan ak ate sisanun tinid dububuni wan diḡane diaug ate Jesus san sisanun dububuni wo mutou fun na diau a. ³ Tureḡ diabi dugo in nug dusumiani, “Enti mok pat tubun a mutou awan te yan ibilip yau panad ak i?”

⁴ Mutou fun na dilasag malad diabisa man, pat tubun an dubulig yaug, gigin na yen dugo dile ya. ⁵ Saen pat gubaran ilon lo diladu man, malad yaug pinein ta yamel milkouk di milaen ak igane yan dile ya. In pat gubaran titin won ak lo imasig imado se ya. Dile man durut go direr saian geig a.

⁶ Agog in irupidai, “An arut arer amoi. An Jesus Nasaret san tamol aigim fo dibali amaiak aban an abi da. In kumaen imasa ya! In ete man tia ya. Apalup, aben e diganeg yen en ale. ⁷ Ago yak ninen o amul aup, in anen megeloum adi, Pita dida, bilalun en arupidai a, ‘In imug mi Galili na yau dop

an apalu wa. Onte gup ale wa, nek ibol inſen gubak mi irupidai ak ago ya.’ ”

⁸ Agog pein utol an dusuruwor dugo ilod ibarkikaruk saian geig a. An niſen o pat gubaran dibiseig kuai te dilasag dusol go diau a. In ru ta tamolpein aenta lo mel an niſen o ta dubol ilasa na ya, man dugo, in direr geig a.

Magdala san Maria Jesus ile ya

Mat 28:9-10; Jon 20:11-18

⁹ Aria, Jesus imasa yak san nal man, ubou turan san nal malmalan ama ya. Saen an lo in imug mi Magdala san pein Maria, naon na kuai isi dugo ile ya. Wagam mi Jesus ur sisaiak 7 pein an tinin lo ikudaig diau ak ama ya. ¹⁰ Pein an yaug, tamolpein a gubak mi Jesus dida turen diabi na yan, ilod ipapao dugo ditata on se yan inſad na ilasag mel dugo ilasa yan niſen o irupidai a. ¹¹ Ak gug saen Jesus kumaen imado dugo Maria ile man, ru ibol an niſen o ilod rumok man tia ya.

Megeloum uraru dal te Jesus dile ya

Luk 24:13-35

¹² Murnag tamol uraru gubak mi Jesus nien aban diri na yan, Jerusalem lubanek ilon lo turen diabi se ya. Dal im diau dugo, Jesus naod na ilasa man naon tinin sen geig, agog dida diau se ya. ¹³ Tamol uraru emaiak dumul diaug aenta durupidai a, ak gug in tamol uraru an dam ilod lo ta rumok na ya.

Jesus megeloum murnap ata digane wak niſen o irupidai a

Mat 28:16-20; Luk 24:13-53; Jon 20:19-23; Apo 1:6-8

¹⁴ Murna gug saen megeloum 11 anañ dunuai man, Jesus kuai isi dugo dile ya. Jesus ipidai a, man dugo, in ilo rumok amad tia ya, agod ilod dabai geig ak on in tamolpein a Jesus kumaen imasa gug dile yan, in sad ru ilod lo rumok an ninen o dumoi a.

¹⁵ Jesus irupidai, “An amasap, tan fidian lo ator dop, tamolpein fidian mi ante dumado dan bilalun uyanan en afulalep dulon a. ¹⁶ Ensauta a ilod lo rumok pe suguek dinane dan patu pasek dinane wa. Ak gug ensauta a ilod ta rumok na yan kot lo diau dudup dideg diau a. ¹⁷ Agod kulob naok igo yan man, tamolpein a naj o ilod rumok dan dida diau a. In naj yan jag lo ur sisaiak adi dukudaip diau ak, in mroun ru sensen ak dinanep ate dininen a. ¹⁸ In sed banid nam mot wagai ak duburou a. In marasin saiak ta tamol ifuni imat san ka duluk a, gug ta dumat na wa. Agod in aned banid subam adi tinid fo diganep uyadi da wa.”

*Jesus kumaen panu na isuda yau a
Luk 24:50-53; Apo 1:9-11*

¹⁹ Tubun ak Jesus ru an fidian irupidai itout man, Anut in in aneg isuda yang kumaen panu na ilasa ya. Ante man in Anut san aben malan te banin won ak lo imasig imado da. ²⁰ Agog in anen megeloum adi dufurak go, gidigheid diaug in anen ru dubol ilasa na ya. Agod Tubun en in sen in dida urat digane se ya, ago dugo kulob funfun kob aman da idiri dilasa yan lo tamolpein dile man, in anen ru man ru rumok a.

Anut san bilalug foun
The New Testament in the Takia Language of Papua
New Guinea
Nupela Testamen long tokples Takia long Niugini

Copyright © 1999 The Bible Society of Papua New Guinea

© Faith Comes by Hearing

Language: Takia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

PDF generated using Haiola and XeLaTeX on 22 Feb 2024 from source files dated 31 Aug 2023

757b3e4e-2023-5b45-893a-ee9294ddeb9d